



FLETORJA ZYRTARE E REPUBLIKËS SË SHQIPËRISË

Botim i Qendrës së Publikimeve Zyrtare

www.legjislacionishqiptar.gov.al

Nr.73

19 qershor

2007

P Ë R M B A J T J A

Faqe

Ligj nr.9713 datë 16.4.2007	Për disa ndryshime në ligjin nr.8560, datë 22.12.1999 “Për procedurat tatimore në Republikën e Shqipërisë”, të ndryshuar.....	2155
Vendim i Kuvendit nr.109, datë 18.6.2007	Për mosmiratimin e dekretit nr.5288, datë 8.5.2007 të Presidentit të Republikës “Për kthimin e ligjit nr.9713, datë 16.4.2007 “Për disa ndryshime në ligjin nr.8560, datë 22.12.1999 “Për procedurat tatimore në Republikën e Shqipërisë”, të ndryshuar”.....	2157
Ligj nr.9740 datë 21.5.2007	Për shfuqizimin e ligjit nr.8637, datë 6.7.2000 “Për Policinë Elektrike”, të ndryshuar.....	2157
Ligj nr.9744 datë 28.5.2007	Për disa ndryshime dhe shtesa në ligjin nr.8701, datë 1.12.2000 “Për lojërat e fatit, kazinotë dhe hipodromet”, të ndryshuar.....	2158
Ligj nr.9745 datë 28.5.2007	Për disa ndryshime dhe shtesa në ligjin nr.9632, datë 30.10.2006 “Për sistemin e taksave vendore”.....	2168
Ligj nr.9747 datë 31.5.2007	Për disa ndryshime në ligjin nr.8088, datë 21.3.1996 “Për shoqëritë e bashkëpunimit reciprok”, të ndryshuar.....	2169
Ligj nr.9748 datë 31.5.2007	Për një ndryshim në ligjin nr.7632, datë 4.11.1992 “Për dispozitat që rregullojnë pjesën e parë të Kodit Tregtar”.....	2170
Ligj nr.9749 datë 4.6.2007	Për Policinë e Shtetit.....	2171
Ligj nr.9750 datë 4.6.2007	Për disa shtesa në ligjin nr.9072, datë 22.5.2003 “Për sektorin e energjisë elektrike”, të ndryshuar.....	2206

LIGJ
Nr.9713, datë 16.4.2007

**PËR DISA NDRYSHIME NË LIGJIN NR.8560, DATË 22.12.1999 “PËR PROCEDURAT
TATIMORE NË REPUBLIKËN E SHQIPËRISË”, TË NDRYSHUAR**

Në mbështetje të neneve 78, 83 pika 1 dhe 155 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Në ligjin nr.8560, datë 22.12.1999 “Për procedurat tatimore në Republikën e Shqipërisë”, të ndryshuar, bëhen këto ndryshime:

Neni 1

Neni 37 ndryshohet si më poshtë:

“Neni 37

Pagimi i tatimeve, taksave dhe kontributeve

1. Pagimi i tatimeve, taksave dhe kontributeve të sigurimeve shoqërore e shëndetësore është i detyrueshëm brenda afateve të përcaktuara me ligje të veçanta tatimore.

2. Pavarësisht nga dispozitat e parashikuara në këtë ligj apo në ligje të tjera të veçanta tatimore, shuma e detyrimit për t'u paguar nga tatimpaguesit, me vlerë deri në 1 000 (një mijë) lekë, në përputhje me deklaratën tatimore apo vlerësimin tatimor, trajtohet si detyrim në vlerë zero.”.

Neni 2

Neni 41 ndryshohet si më poshtë:

“Neni 41

Pagesa me këste

Në raste të veçanta dhe të argumentuara me gjendjen financiare, kur një tatimpagues nuk mund të paguajë plotësisht dhe menjëherë detyrimin tatimor, organi tatimor përkatës, sipas kërkesës me shkrim, mund të hartojë një plan pagese me këste. Në raste të tilla, tatimpaguesi paguan interesat për të gjithë kohëzgjatjen e pagesës me këste. Plani i pagesës me këste është një marrëveshje me shkrim, e përgatitur sipas përcaktimit në Kodin Civil dhe e nënshkruar nga kryetari i degës përkatëse të tatimeve, si dhe nga tatimpaguesi. Plani i pagesës me këste anulohet kur kushtet, në të cilat është hartuar, nuk ekzistojnë më.

Rregullat, procedurat dhe kohëzgjatja e pagesës me këste përcaktohen me udhëzim të Ministrit të Financave.”.

Neni 3

Neni 43 ndryshohet si më poshtë:

“Neni 43

Detyrimi për pagesë të menjëhershme

1. Para se të paraqiten për apelim në shkallët e apelimit administrativ, tatimpaguesit janë të detyruar të parapaguajnë detyrimin tatimor, pa përfshirë interesat dhe gjobat që lidhen me këtë detyrim.

2. Para se të paraqiten për shqyrtim gjyqësor, tatimpaguesit janë të detyruar të paguajnë 15 për qind të çdo gjobe dhe interesi. Shqyrtimi gjyqësor i çështjeve zhvillohet sipas një procedure gjyqësore të përshpejtuar, e cila nuk duhet t'i kalojë 60 ditë.

Administrata tatimore detyrohet të bëjë ekzekutimin e vendimeve gjyqësore, në të kundërt zyrat e përmbarimit i ekzekutojnë ato menjëherë.”.

Neni 4

Neni 49 ndryshohet si më poshtë:

“Neni 49

Shkeljet dhe dënimet për regjistrimin

1. Kryerja e veprimtarisë pa u regjistruar në organet tatimore dhe pa u pajisur më parë me certifikatën tatimore është shkelje dhe dënohet si më poshtë:

a) me bllokim të veprimtarisë, deri në regjistrimin e tatimpaguesit dhe pajisjen e tij me certifikatë tatimore. Në rastin e transportit, ky dënim shoqërohet me marrjen e lejes së qarkullimit të automjetit të peregjistruar dhe të papajisur me certifikatë tatimore;

b) me sekuestrim të pasurive në vendin e biznesit, kur tatimpaguesi, ndaj të cilit është marrë masa e bllokimit, gjendet duke ushtruar veprimtarinë.

2. Mosnjoftimi në degën e tatimeve i ndryshimeve në regjistrim, që kanë të bëjnë me adresën e vendit të ushtrimit të veprimtarisë, është shkelje dhe dënohet si më poshtë:

a) me bllokim të veprimtarisë, deri në regjistrimin e adresës së re të vendit të ushtrimit të saj dhe pajisjen e saj me certifikatë dytësore tatimore. Në rastin e transportit, ky dënim shoqërohet me marrjen e lejes së qarkullimit të automjetit të peregjistruar dhe të papajisur me certifikatë dytësore tatimore;

b) me sekuestrim të pasurive në vendin e ri të biznesit, kur tatimpaguesi, ndaj të cilit është marrë masa e bllokimit, gjendet duke ushtruar veprimtarinë.”.

Neni 5

Neni 52 ndryshohet si më poshtë:

“Neni 52

Shkeljet dhe dënimet për mosdokumentim

Ruajtja, përdorimi dhe transportimi i mallrave pa dokumentacionin e përcaktuar në udhëzimin e Ministrit të Financave, në zbatim të këtij ligji, është shkelje dhe dënohet me sekuestrimin e mallrave të padokumentuara.”.

Neni 6

Ky ligj hyn në fuqi 15 ditë pas botimit në Fletoren Zyrtare.

VENDIM
Nr.109, datë 18.6.2007

PËR MOSMIRATIMIN E DEKRETIT NR.5288, DATË 8.5.2007 TË PRESIDENTIT TË REPUBLIKËS “PËR KTHIMIN E LIGJIT NR.9713, DATË 16.4.2007 “PËR DISA NDRYSHIME NË LIGJIN NR.8560, DATË 22.12.1999 “PËR PROCEDURAT TATIMORE NË REPUBLIKËN E SHQIPËRISË”, TË NDRYSHUAR”

Në mbështetje të nenit 85 pika 2 të Kushtetutës dhe të nenit 86 të Rregullores së Kuvendit,

KUVENDI
I REPUBLIKËS SË SHQIPËRISË

VENDOSI:

I. Mosmiratimin e dekretit nr.5288, datë 8.5.2007 të Presidentit të Republikës “Për kthimin e ligjit nr.9713, datë 16.4.2007 “Për disa ndryshime në ligjin nr.8560, datë 22.12.1999 “Për procedurat tatimore në Republikën e Shqipërisë”, të ndryshuar”.

II. Ky vendim hyn në fuqi menjëherë.

KRYETARE
Jozefina Topalli (Çoba)

LIGJ
Nr.9740, datë 21.5.2007

PËR SHFUQIZIMIN E LIGJIT NR.8637, DATË 6.7.2000
“PËR POLICINË ELEKTRIKE”, TË NDRYSHUAR

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Neni 1

Ligji nr.8637, datë 6.7.2000 “Për Policinë Elektrike”, i ndryshuar, shfuqizohet.

Neni 2

Ngarkohet Ministri i Ekonomisë, Tregtisë dhe Energjetikës të nxjerrë aktet e nevojshme nënligjore në zbatim të këtij ligji.

Neni 3

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.5346, datë 7.6.2007 të Presidentit të Republikës së Shqipërisë, Alfred

Moisiu

LIGJ
Nr.9744, datë 28.5.2007

PËR DISA NDRYSHIME DHE SHITESA NË LIGJIN NR. 8701,
DATË 1.12.2000 “PËR LOJËRAT E FATIT, KAZINOTË DHE HIPODROMET”, TË
NDRYSHUAR

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Në ligjin nr.8701, datë 1.12.2000 “Për lojërat e fatit, kazinotë dhe hipodromet”, të ndryshuar, bëhen këto ndryshime dhe shtesa:

Neni 1

Neni 2 ndryshohet si më poshtë:

“Neni 2
Përkufizime

Në këtë ligj termat e mëposhtëm kanë këto kuptime:

1. “Lojëra fati” janë ato lojëra, ku pjesëmarrësit paguajnë një shumë të caktuar dhe ku faktori fat ka ndikim të drejtpërdrejtë si në fitimin, ashtu edhe në humbjen e pjesëmarrësve në secilën lojë.

Nuk quhen lojëra fati:

konkurset që zhvillohen në bazë të njohurive të pjesëmarrësve, ku fituesi merr një çmim të caktuar, të vendosur për këtë qëllim;

pagesat që bëhen nga sigurimi i jetës ose llojet e tjera të sigurimit nëpërmjet tërheqjes me short të biletave, të emetuara për këtë qëllim.

2. “Organizator” është personi juridik, i cili pajiset me lejen e ushtrimit të veprimtarisë në fushën e lojërave të fatit, kazinove dhe hipodromeve, në zbatim të dispozitave të këtij ligji.

3. “Mjetet e lojërave” janë mjetet elektrike, elektronike ose mekanike, që përdoren ose synohet të përdoren për të luajtur lojëra fati dhe funksionimi i të cilave ka një ndikim mbi rezultatit e lojës.

4. “Publicitet” është çdo formë njoftimi për promovimin e lojërave të fatit, qëllimi i dukshëm i së cilës është dhënia e informacionit publikut në dhe botime të printuara, njoftime, qarkore ose ndonjë formë apo mjet tjetër të komunikimit publik.

5. “Licencë” është akti administrativ, me anë të cilit i licencuari ka të drejtë të ushtrojë veprimtarinë në fushën e lojërave të fatit, kazinove dhe hipodromeve.

6. “I licencuar” është personi juridik (ose bashkim personash juridikë), i cili zotëron një licencë të lëshuar në bazë të dispozitave të këtij ligji.

7. “Bashkim personash juridikë” është një marrëveshje e shkruar, ndërmjet dy ose më shumë personave juridikë, që ka për objekt kryerjen e veprimtarisë në lojërat e fatit, ku përcaktohet roli i secilës palë dhe ku njëra prej tyre përcaktohet si shoqëri kryesuese, që përfaqëson bashkimin në marrjen e licencës në fushën e lojërave të fatit.

8. “Luajtje” është pjesëmarrja në një lojë fati, ku lojtari ose lojtarët, me vendosjen e shumës, marrin pjesë në mundësinë për marrjen e një çmimi.

9. “Aplikant” është personi juridik apo bashkim i personave juridikë, që bëjnë kërkesë, ose marrin pjesë në konkurrim, për t’u pajisur me licencë në fushën e lojërave të fatit, kazinotë dhe hipodromet.

10. “Lojë fati promociionale” është një lojë, që promovon produkte ose shërbime, në të cilën pjesëmarrësit mund të konkurrojnë për çmime apo bonuse.”.

Neni 2

Në nenin 3 bëhen shtesat dhe ndryshimet si më poshtë:

1. Në fund të pikës 1 shtohet paragrafi me këtë përmbajtje:

“Keno: Një lojë fati, gjatë së cilës organizatori u ofron pjesëmarrësve mundësinë e zgjedhjes së disa numrave nga një grup i caktuar numrash, të shënuar në një biletë të caktuar. Loja keno përcaktohet me tri shkronja “a”/ “b”/“c”, ku: “a” është grupi i numrave të zgjedhur nga lojtari; “b” është grupi i numrave të dalë nga hedhja e shortit; “c” është grupi i të gjithë numrave të biletës.”.

2. Në pikën 3 bëhen këto ndryshime:

a) Paragrafi i parë ndryshohet si më poshtë:

“3. “Lotaria kombëtare” është lojë fati, ku organizatori i ofron blerësit të tyre mundësinë të fitojë një shumë të caktuar, nëse fiton numri ose kombinimi i numrave apo simboleve, që shënohen në biletën e hedhur në qarkullim nga organizatori.”.

b) Në paragrafin e dytë, fjalët “lotaritë klasifikohen në:” zëvendësohen me fjalët “Lotaria kombëtare përfshin:”.

3. Në fund të pikës 4 shtohet një paragraf me këtë përmbajtje:

“Nuk konsiderohen lojëra elektronike me fitim në çast makinat elektronike apo kompjuterat elektronikë, të cilët kanë më shumë se një pozicion loje. Lojëra elektronike me fitim në çast sipas këtij ligji, konsiderohen vetëm makinat e tipit slot.

Personat, të cilët kanë instaluar makina elektronike apo kompjutera elektronikë, të cilët nuk konsiderohen si të tillë nga paragrafi i mësipërm, detyrohen t’i heqin ato brenda 6 muajve nga hyrja në fuqi e këtij ligji.”.

Neni 3

Pas nenit 3 shtohen nenet 3/1, 3/2, 3/3, 3/4 dhe 3/5 me këtë përmbajtje:

“Neni 3/1

Mbrojtja e të miturve

Organizatorit i ndalohet të punësojë persona nën moshën 21 vjeç, si dhe të lejojë personat nën moshën 21 vjeç të futen apo të luajnë në mjediset e lojërave të fatit, kazinove dhe hipodromeve.

Neni 3/2

Mbrojtja e lojtarit

1. Në mjedisin ku luhen lojërat e fatit duhet të ekspozohet gjithmonë një shenjë e dukshme paralajmëruese për lojtarët, për të treguar mundësinë e ndikimit negativ nga lojërat e fatit.

2. Ndalohet ndërtimi/marrja me qira e mjediseve, me fushë veprimtarie lojëra fati, të ekspozuara ndaj institucioneve fetare, arsimore dhe shëndetësore.

Neni 3/3

Ndalimi i nxitjes për pjesëmarrje në lojërat e fatit

1. Ndalohet ofrimi, ndihma ose nxitja e një loje apo e lojërave të fatit në Republikën e

Shqipërisë, në kundërshtim me dispozitat e këtij ligji.

2. Ndalohet zhvillimi i lojërave on-line nëpërmjet internetit nga shoqëritë e licencuara, sipas këtij ligji, përjashtuar shoqëritë e basteve sportive.

3. Zhvillimi i lojërave të fatit on-line nëpërmjet internetit lejohet të kryhet nga shoqëritë e basteve sportive, vetëm pas marrjes së autorizimit nga ministri përgjegjës për ekonominë. Këshilli i Ministrave përcakton rregullat e zhvillimit të lojërave të basteve sportive on-line nëpërmjet internetit, si dhe kriteret për dhënien e autorizimit shoqërive të basteve sportive për zhvillimin e lojërave on line nëpërmjet internetit.

4. Asnjë person fizik apo juridik, i krijuar sipas legjislacionit në fuqi, nuk ka të drejtë t'i japë para hua, kredi një personi tjetër fizik apo juridik për të marrë pjesë në luajtjen e lojërave të fatit.

Neni 3/4

Publiciteti i lojërave të fatit

Ndalohet publiciteti për lojëra fati në një mënyrë që shfaqet veçanërisht për të miturit ose që i paraqet lojërat e fatit si zgjidhje të problemeve financiare.

Ndalohet publiciteti në radio, televizione dhe gazeta.

Neni 3/5

Lojëra fati promicionale

1. Subjektet publike ose private mund të organizojnë lojëra fati promicionale në shitjen dhe tregtimin e mallrave, për efekt promovimi ose publiciteti, pas marrjes së autorizimit përkatës nga ministri përgjegjës për ekonominë.

2. Mënyrat, format, kriteret dhe rregullat shtesë për publicitetin e lojërave të fatit dhe veprimtaritë promicionale, me qëllim tregtimi, përcaktohen me vendim të Këshillit të Ministrave.”.

Neni 4

Në nenin 6 bëhen këto ndryshime dhe shtesa:

1. Në pikën 1 hiqet fjala “Lotaritë” dhe fjalët “Lojërat sportive të fatit” zëvendësohen me fjalët “bastet sportive”.

2. Pas pikës 1 shtohen pikat 1.1 dhe 1.2 me këtë përmbajtje:

“1.1. Ministri përgjegjës për ekonominë, me propozimin e Komitetit të Lojërave të Fatit, jep licencën “Lotari kombëtare” për një periudhë 10-vjeçare. Kjo licencë është një e vetme dhe i jepet aplikantit, i cili përzgjidhet i pari në procesin e konkurrimit, të zhvilluar sipas procedurave të përcaktuara në këtë ligj. Organizatori, për marrjen e licencës “Lotari kombëtare”, duhet të paguajë shumën prej 120 000 000 (njëqind e njëzet milionë) lekësh.

1.2. Ministri përgjegjës për ekonominë, me propozimin e Komitetit të Lojërave të Fatit, jep licencën “Konkurs për parashikimet sportive” për një periudhë 10-vjeçare. Kjo licencë është një e vetme dhe i jepet aplikantit, i cili përzgjidhet i pari në procesin e konkurrimit, të zhvilluar sipas procedurave të përcaktuara në këtë ligj. Organizatori, për marrjen e licencës “Konkurs për parashikimet sportive” duhet të paguajë shumën prej 120 000 000 (njëqind e njëzet milionë) lekësh.”.

3. Pas pikës 2 shtohen shkronjat “a” dhe “b” me këtë përmbajtje:

“a) Procedura për hapjen dhe mbylljen e sallave, ku zhvillohet veprimtaria e lojërave të fatit, përcaktohet me udhëzim të ministrit përgjegjës për ekonominë.

b) Numri i mjeteve të lojërave, për çdo mjedis ku luhen lojëra elektronike, është jo më pak se 10 dhe jo më shumë se 70, për rrethet e kategorisë së parë; jo më pak se 5 dhe jo më shumë se 50, për rrethet e kategorisë së dytë; jo më pak se 3 dhe jo më shumë se 30, për rrethet e kategorisë së tretë.”.

4. Pika 3 shfuqizohet.

Neni 5

Në nenin 7 bëhen këto ndryshime:

1. Në paragrafin e parafundit, fjalia “Mënyra, forma dhe shuma e garancive përcaktohen në lejen që i jepet organizatorit, në përputhje me dispozitat e këtij ligji.” zëvendësohet me fjalinë “Mënyra, forma dhe shuma e garancive përcaktohen me udhëzim të ministrit përgjegjës për ekonominë.”.

2. Pas paragrafit të fundit shtohet paragrafi me këtë përmbajtje:

“Kapitali themeltar i shoqërisë është: jo më i vogël se 10 000 000 (dhjetë milionë) lekë për shoqëritë e licencuara në kategoritë “lojëra aritmetike” dhe “lojëra elektronike”; 20 000 000 (njëzet milionë) lekë për shoqëritë e basteve sportive; 100 000 000 (njëqind milionë) lekë për shoqëritë e licencuara për “Lotarinë kombëtare” dhe “Konkurs për parashikimet sportive”.

Deklaron vendin, ku do të ushtrojë veprimtarinë (sallat, sipas kategorisë së lojërave të fatit), pikat e shitjes së biletave dhe mjetet e lojërave të fatit.”.

Neni 6

Pas nenit 7 shtohen nenet 7/1, 7/2, 7/3, 7/4 e 7/5 me këtë përmbajtje:

“Neni 7/1

Kërkesa për licencën “Lotari kombëtare”

1. Çdo person juridik apo bashkim personash juridikë, vendas ose i huaj, ka të drejtë të paraqesë kërkesën me shkrim pranë ministrisë përgjegjëse për ekonominë, për t’u pajisur me licencën “Lotari kombëtare”.

2. Kërkesa për licencën “Lotari kombëtare” duhet të shoqërohet me dokumentet e mëposhtme, me kushtin që këto dokumente të jenë brenda 3 muajve nga data e miratimit nga organet përgjegjëse shtetërore:

a) dokumentet, origjinale apo të noterizuara, që vërtetojnë se aplikanti është i organizuar në formë shoqërishe apo bashkim shoqërishe, si dhe aktin e themelimit të shoqërisë e statutin;

b) vetëdeklarim që aplikanti nuk është në proces falimentimi apo likuidimi;

c) një kopje të noterizuar të lejes për ushtrimin e veprimtarisë në fushën e lojërave të fatit, nëse ka, të dhënë nga organi përkatës i vendit ku aplikanti ka selinë qendrore;

ç) deklaratën për burimin e kapitalit, që do të investohet për ushtrimin e veprimtarisë në fushën e lotarisë kombëtare;

kapitali themeltar i shoqërisë të jetë jo më i vogël se 100 000 000 (njëqind milionë) lekë;

dh) vërtetimin nga organet tatimore, sipas legjislacionit në fuqi, për shlyerjen e detyrimeve ndaj shtetit, si nga shoqëria që aplikon, ashtu edhe nga çdo subjekt juridik, në rast bashkimi shoqërishe;

e) planbiznesin për zhvillimin e veprimtarisë për “Lotarinë kombëtare”;

ë) dokumentin, që vërteton përvojën e subjektit në fushën e lotarive apo të lojërave të fatit.

3. Informacioni, që shoqëron kërkesën për licencë “Lotari kombëtare”, përfshin, të paktën:

a) të dhëna personale për aksionerët kryesorë të shoqërisë, që kontrollojnë paketën kryesore të aksioneve dhe pronarët kryesorë përfitues;

b) të dhëna për organet drejtuese të aplikantit;

c) të dhëna financiare për kryerjen e biznesit të aksionerëve të aplikantit, për 3 vitet e fundit, përpara paraqitjes së kërkesës;

ç) vetëdeklarimin nga aksionerët e shoqërisë dhe përfaqësuesit në organet drejtuese të saj se nuk janë në ndjekje penale;

d) çdo informacion tjetër, që mund t’i kërkohej aplikantit nga Komiteti i Lojërave të Fatit dhe që gjykohej i nevojshëm nga ai për fushën e veprimtarisë që do të ushtrohet.

4. Kundërshtimi, refuzimi, si dhe privilegjet e kërkuara nga aplikanti, në kundërshtim me përcaktimet e parashikuara në shkronjën “d” të pikës 3 të këtij neni përbëjnë shkak ligjor për

refuzimin e kërkesës nga Komiteti i Lojërave të Fatit.

5. Ministria përgjegjëse për ekonominë, brenda 30 ditëve pas paraqitjes së një kërkesë, publikon njoftimin për konkurrim në lojërat e fatit për “Lotari kombëtare”, të paktën në një gazetë të huaj, me qarkullim ndërkombëtar, në dy gazeta që botohen në vendin tonë, në dy numra radhazi, si dhe në Buletin e Njoftimeve Publike.

Njoftimi duhet të përmbajë:

- a) vendin, datën dhe orën e paraqitjes së dokumenteve;
- b) gjuhën e paraqitjes së dokumenteve;
- c) mënyrën e paraqitjes së dokumenteve;
- ç) vendin, orën dhe datën e shqyrtimit të dokumenteve.

Neni 7/2

Përzgjedhja e subjektit

1. Përzgjedhja e subjekteve për kategorinë e lojërave të fatit “Lotari kombëtare” bëhet nga Komiteti i Lojërave të Fatit, i ngritur pranë ministrisë përgjegjëse për ekonominë.

Procedurat e përgatitjes së dokumenteve të garës bëhen në përputhje me rregullat e përcaktuara sipas legjislacionit për prokurimin publik.

2. Komiteti i Lojërave të Fatit bën klasifikimin e subjekteve, sipas kriterëve të vlerësimit, të përcaktuara në tabelën nr.1, që i bashkëlidhet këtij ligji.

3. Anëtarët e Komitetit të Lojërave të Fatit duhet të vetëdeklarojnë, nën përgjegjësinë e tyre, se pjesëmarrja e tyre në këtë komitet nuk përbën shkak për lindjen e një konflikti interesi me subjektet pjesëmarrëse në konkurrim. Për mosdeklarim zbatohen masat e parashikuara në ligjin nr.9367, datë 7.4.2005 “Për parandalimin e konfliktit të interesave në ushtrimin e funksioneve publike”.

4. Komiteti i Lojërave të Fatit, në përfundim, shpall listën e pjesëmarrësve në konkurrim, duke filluar renditjen nga aplikanti, që ka marrë numrin më të madh të pikëve dhe ia paraqet për miratim ministrit përgjegjës për ekonominë.

5. Komiteti i Lojërave të Fatit njofton aplikantët, që kanë marrë pjesë në konkurrim, për rezultatet përfundimtare.

6. Kur aplikanti, i renditur i pari në listë, nuk vazhdon procedurat për marrjen e lejes, brenda 30 ditëve nga data e shpalljes së tij fitues, skualifikohet nga ministri përgjegjës për ekonominë dhe shpallet fitues konkurrenti i renditur i dyti, sipas listës së miratuar.

Në rast se edhe konkurrenti i dytë nuk vazhdon procedurën për marrjen e lejes, ministri urdhëron përsëritjen e garës.

Neni 7/3

Njoftimi i fituesit

1. Pas miratimit të listës së pjesëmarrësve në konkurrim, ministri përgjegjës për ekonominë urdhëron publikimin e njoftimit të fituesit në faqen zyrtare të internetit të ministrisë përgjegjëse për ekonominë. Brenda 30 ditëve nga data e shpalljes së njoftimit, aplikanti ka të drejtë të paraqesë çdo ankesë në ministrinë përgjegjëse për ekonominë për procedurën e zhvilluar.

2. Ministri përgjegjës për ekonominë, brenda 30 ditëve nga data e paraqitjes së ankesës, përfundon shqyrtimin administrativ dhe njofton ankuesin për vendimin e marrë.

Neni 7/4

Dhënia e licencës “Lotari kombëtare”

1. Me përfundimin e afatit për paraqitjen e ankesave, ministri përgjegjës për ekonominë miraton dhënie të licencës “Lotari kombëtare”, pasi aplikanti i shpallur fitues të ketë plotësuar kushtet e mëposhtme:

- a) aplikanti, vendas apo i huaj, i shpallur i pari në listë, brenda 30 ditëve duhet të paraqesë

një garanci bankare, të lëshuar nga një bankë me seli në territorin e Republikës së Shqipërisë, në emër të ministritë përgjegjëse për ekonominë, si garanci për pagesën dhe shpërndarjen e çmimeve nga i licencuari për fituesit e lojërave, që përbëjnë pjesë të lotarisë në bazë të rregulloreve, të bëra sipas këtij ligji;

b) aplikanti i huaj, i shpallur i pari në listë, brenda 30 ditëve duhet të regjistrohet si person juridik shqiptar, sipas legjislacionit shqiptar në fuqi.

Neni 7/5

Konkurs për parashikimet sportive

Procedura për licencim për “Konkurs për parashikimet sportive”, ku përfshihen kërkesa për licencë, përzgjedhja e subjektit, njoftimi i fituesit dhe dhënia e licencës, janë të njëjta me ato të përcaktuara në nenet 7/1, 7/2, 7/3 dhe 7/4 të këtij ligji.”.

Neni 7

Neni 8 ndryshohet si më poshtë:

“Neni 8

Pezullimi dhe revokimi i licencës për lojëra fati

1. Ministri përgjegjës për ekonominë, me propozimin e Komitetit të Lojërave të Fatit, pezullon për 30 ditë licencën e dhënë për lojëra fati, kur vëren se organizatori:

nuk shlyen detyrimet ndaj fituesve të lojës;

nuk zbaton ose shkel detyrimet e parashikuara në dispozitat e këtij ligji dhe në aktet nënligjore, të dala në zbatim të tij.

2. Ministri përgjegjës për ekonominë, me propozimin e Komitetit të Lojërave të Fatit, revokon licencën e dhënë për lojëra fati kur vëren se:

licenca është marrë në bazë të dokumenteve të rreme;

në përfundim të afatit të pezullimit të licencës, organizatori nuk ka shlyer detyrimet ligjore, për të cilën i është pezulluar licenca;

zhvillimi i veprimtarisë së subjektit të licencuar bie në kundërshtim me dispozitat e këtij ligji, me akte të tjera nënligjore të dala në zbatim të tij dhe me kushtet e përcaktuara në licencën e dhënë.”.

Neni 8

Në nenin 10 pika 4 bëhen shtesa dhe ndryshimi si më poshtë:

1. Pas nënndarjes “ii” të shkronjës “a” shtohet nënndarja “iii” me këtë përmbajtje:

“iii) organizatori i lojës keno paguan tatim për lojërat e fatit 20 për qind mbi vëllimin e qarkullimit, gjithsej, të realizuar në bazë të arkëtimeve nga shitja e biletave. Organizatori, për çdo lojë, duhet t’u kthejë lojtarëve, në formën e fitimit, jo më pak se 50 për qind të shumës së vënë në lojë.”.

2. Në shkronjën “ç” fjala “lotari” zëvendësohet me fjalët “Lotari kombëtare”.

Neni 9

Në nenin 13 bëhen këto ndryshime:

1. Pika 2 ndryshohet si më poshtë:

“2. a) zonat e përcaktuara në territorin e Republikës së Shqipërisë, ku mund të hapen kazinotë, janë si më poshtë:

zona turistike e Vlorës;

zona turistike e Sarandës;

zona turistike e Durrësit;
qyteti i Tiranës;
zona turistike e Velipojës.

Organizatori, i pajisur me licencë, nuk mund të hapë më shumë se një kazino në këto zona;
b) numri i kazinove, për çdo zonë, përcaktohet me vendim të Këshillit të Ministrave.
2. Në pikën 6 fjalët “në çastin e dhënies së lejes” shfuqizohen.

Neni 10

Në nenin 14 bëhen shtesa dhe ndryshimi si më poshtë:

1. Në fund të pikës 2 shtohen fjalët “në përputhje me rregulloren e miratuar nga ministri përgjegjës për ekonominë”.
2. Në pikën 3 fjalët “18 vjeç” zëvendësohen me fjalët “21 vjeç”.

Neni 11

Neni 16 ndryshohet si më poshtë:

“Neni 16

Pezullimi dhe revokimi i licencës për kazinotë

1. Ministri përgjegjës për ekonominë, me propozimin e Komitetit të Lojërave të Fatit, pezullon për 30 ditë licencën e dhënë për kazino, kur vëren se organizatori:
nuk shlyen detyrimet ndaj fituesve të lojës;
nuk zbaton ose shkel detyrimet e parashikuara në dispozitat e këtij ligji dhe në aktet nënligjore të dala në zbatim të tij.
2. Ministri përgjegjës për ekonominë, me propozimin e Komitetit të Lojërave të Fatit, revokon licencën e dhënë për kazino kur vëren se:
licenca është marrë në bazë të dokumenteve të rreme;
në përfundim të afatit të pezullimit të licencës, organizatori nuk ka shlyer detyrimet ligjore, për të cilën i është pezulluar licenca;
zhvillimi i veprimtarisë së subjektit të licencuar bie në kundërshtim me dispozitat e këtij ligji, me aktet të tjera nënligjore të dala në zbatim të tij dhe me kushtet e përcaktuara në licencën e dhënë.”.

Neni 12

Në nenin 21 pika 3 ndryshohet si më poshtë:

“3. Miratimi i rregullores së paraqitur nga organizatori bëhet nga ministri përgjegjës për ekonominë, me propozimin e Komitetit të Lojërave të Fatit, në përputhje me kriteret e përcaktuara në rregulloren e miratuar për këtë qëllim.”.

Neni 13

Në nenin 24, në fund të pikës 1 shtohet paragrafi me këtë përmbajtje:

“Të këtë miratimin e ministrisë përgjegjëse për rendin publik për kontrollin dhe sigurinë e hipodromit.”.

Neni 14

Neni 26 ndryshohet si më poshtë:

“Neni 26

Pezullimi dhe revokimi i licencës për hipodromet

1. Ministri përgjegjës për ekonominë, me propozimin e Komitetit të Lojërave të Fatit, pezullon për 30 ditë licencën e dhënë për hipodrom, kur vëren se organizatori:

nuk shlyen detyrimet ndaj fituesve të lojës;

nuk zbaton ose shkel detyrimet e parashikuara në dispozitat e këtij ligji dhe në aktet nënligjore të dala në zbatim të tij.

2. Ministri përgjegjës për ekonominë, me propozimin e Komitetit të Lojërave të Fatit, revokon licencën e dhënë për hipodrom kur vëren se:

licenca është marrë në bazë të dokumenteve të rreme;

në përfundim të afatit të pezullimit të lejes, organizatori nuk ka shlyer detyrimet ligjore, për të cilën i është pezulluar licenca;

zhvillimi i veprimtarisë së subjektit të licencuar bie në kundërshtim me dispozitat e këtij ligji, me akte të tjera nënligjore të dala në zbatim të tij dhe me kushtet e përcaktuara në licencën e dhënë.”.

Neni 15

Në nenin 27 pika 2 ndryshohet si më poshtë:

“2. Shkelja e dispozitave të këtij ligji dhe akteve nënligjore të dala në zbatim të tij nga organizatori i lojërave të fatit, kazinove dhe hipodromeve, nëse nuk përbën vepër penale, përbën kundërvajtje administrative dhe dënohet me gjobë si më poshtë:

Gjobë në masën prej 500 000 (pesëqind mijë) lekësh:

a) kur ka ndryshuar selia dhe adresa e sallave të lojërave të shoqërisë dhe nuk ka njoftuar strukturat përgjegjëse në ministrinë përgjegjëse për ekonominë;

b) kur ka ndryshuar personeli i punësuar në shoqëri pa njoftimet paraprake;

c) kur konstatohen të punësuar, të pranishëm në mjediset e lojërave të fatit ose lojtarë nën moshën e ndaluar, sipas dispozitave të këtij ligji;

ç) kur rregulloret e lojërave të fatit nuk janë afishuar në mjediset e lojërave, në mënyrë të dukshme, në dispozicion të lojtarëve, si dhe kur këto mjedise janë të ekspozuara ndaj institucioneve fetare, arsimore dhe shëndetësore;

d) kur kryhet publicitet për lojërë fati në kundërshtim me nenin 3/4 të këtij ligji;

dh) kur konstatohet parregullsi në funksionimin e aparaturave të lojërave të fatit;

e) kur nuk sigurohet kontrolli dhe identifikimi i personave në kazino.

Gjobë në masën prej 1 000 000 (një milion) lekësh:

a) kur konstatohet mosfunksionim i sistemit audioviziv në kazino;

b) kur të dhënat e depozituara nga shoqëria pranë Komitetit të Lojërave të Fatit nuk përputhen me ato të konstatuara gjatë kontrollit;

c) kur konstatohen pajisje të padeklaruara dhe të pacertifikuara;

ç) kur konstatohet që organizatori ka shkelur kërkesat e nenit 3/3 të këtij ligji.

Njësia e Mbikëqyrjes së Lojërave të Fatit vendos sanksionet e parashikuara në këtë nen.

Neni 16

Neni 27/1 ndryshohet si më poshtë:

“Neni 27/1

1. Kur organizatori, person i tatueshëm me tatimin mbi lojërat e fatit, nuk bën deklarinimin brenda 15 ditëve nga afati i përcaktuar në nenin 10 të ligjit nr.8438, datë 28.12.1998 “Për tatimin mbi të ardhurat”, të ndryshuar, detyrohet të paguajë shumën 20 për qind të detyrimit për t’u paguar, por jo më pak se 10 mijë lekë.

2. Kur organizatori i lojërave të fatit, person i tatueshëm me tatimin mbi lojërat e fatit, nuk bën deklarinim brenda 30 ditëve nga afati i përcaktuar në nenin 10 të ligjit nr.8438, datë 28.12.1998 “Për tatimin mbi të ardhurat”, të ndryshuar, detyrohet të paguajë një dënim 50 për qind të detyrimit për t’u paguar, por jo më pak se 25 mijë lekë.

3. Kur organizatori i lojërave të fatit, person i tatueshëm me tatimin mbi lojërat e fatit, nuk paguan brenda 15 ditëve nga afati i përcaktuar në nenin 10 të ligjit nr.8438, datë 28.12.1998 “Për tatimin mbi të ardhurat”, të ndryshuar, detyrohet të paguajë një dënim 20 për qind të detyrimit të papaguar.

4. Nëse personi i tatueshëm bën dy shkelje njëkohësisht, edhe deklarinim të vonuar, edhe pagesë të vonuar, zbatohet dënimi vetëm për deklarinim të vonuar.

5. Kur organizatori i lojërave të fatit, person i tatueshëm me tatimin mbi lojërat e fatit, nuk paguan brenda 30 ditëve nga afati i përcaktuar në nenin 10 të ligjit nr.8438, datë 28.12.1998 “Për tatimin mbi të ardhurat”, të ndryshuar, detyrohet të paguajë një dënim 50 për qind të detyrimit të papaguar.

6. Kur tatimi mbi lojërat e fatit, i deklaruar si i pagueshëm, është më i vogël se tatimi i pagueshëm në fakt dhe kjo konsiderohet si fshehje me dashje, përveç dënimit për pagesë të vonuar, dënohet edhe me gjobë 50 për qind të diferencës së padeklaruar.

7. Për mospagim në afat të detyrimeve tatimore, përveç dënimeve të mësipërme, organizatori i lojërave të fatit paguan edhe interesat për pagesë të vonuar, në përputhje me ligjin nr.8560, datë 22.12.1999 “Për procedurat tatimore në Republikën e Shqipërisë”, të ndryshuar.

8. Për mbledhjen e detyrimeve tatimore të papaguara, organet tatimore marrin masat e përcaktuara në ligjin nr.8560, datë 22.12.1999 “Për procedurat tatimore në Republikën e Shqipërisë”, të ndryshuar.”.

Neni 17

Pas nenit 27/1 shtohet neni 27/2 me këtë përmbajtje:

“Neni 27/2

Subjekti, të cilit i pezullohet ose i revokohet leja, sipas rasteve të parashikuara në këtë ligj, ka të drejtën e ankimit, sipas procedurave të parashikuara në Kodin e Procedurave Administrative.”.

Neni 18

Në nenin 29 shtohet paragrafi me këtë përmbajtje:

“Ngarkohet Këshilli i Ministrave për nxjerrjen e akteve nënligjore në zbatim të këtij ligji.”.

Neni 19

Neni 30/1 ndryshohet si më poshtë:

“Neni 30/1

1. Për kontrollin e zbatimit të ligjshmërisë së ushtrimit të veprimtarisë së subjekteve të licencuara në fushën e lojërave të fatit, kazinove dhe hipodromeve krijohet Njësia e Mbikëqyrjes së Lojërave të Fatit, në varësi të ministrit përgjegjës për ekonominë. Mënyra e funksionimit të kësaj njësie përcaktohet me vendim të Këshillit të Ministrave.

2. Shoqëritë e licencuara në fushën e lojërave të fatit, kazinotë dhe hipodromet derdhen në Buxhetin e Shtetit 1 për qind të fitimit neto mujor të parashikuar. Këto të ardhura do të përdoren për financimin e ushtrimit të veprimtarisë së Njësies së Mbikëqyrjes së Lojërave të Fatit dhe Komitetit të Lojërave të Fatit.”.

Neni 20

Pas nenit 30/2 shtohet neni 30/3 me këtë përmbajtje:

“Neni 30/3
Dispozita kalimtare

1. Licencat për kategoritë e lojërave “lotari çasti” dhe “lotari me shorte”, të lëshuara para hyrjes në fuqi të këtij ligji, revokohen dhe shteti ka detyrimin t’u kthejë subjekteve shumat që rrjedhin nga revokimi.

2. Këshilli i Ministrave përcakton kriteret, mënyrën dhe formën e dëmshpërblimit për këto shoqëri.”.

Neni 21

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.5356, datë 15.6.2007 të Presidentit të Republikës së Shqipërisë, Alfred Moisiu

TABELA 1
TABELA E VLERËSIMIT PËR APLIKANTËT E “LOTARISË KOMBËTARE”

Kriteret e vlerësimit	Pikët e vlerësimit Totali 100 pikë
Planbiznesi	20
Përvoja e subjektit në fushën e lotarive apo të lojërave të fatit	40
Madhësia e kapitalit në lekë:	
120 000 000 – 200 000 000	15
Mbi 200 000 000	25

LIGJ
Nr.9745, datë 28.5.2007

PËR DISA NDRYSHIME DHE SHTESA NË LIGJIN NR.9632,
DATË 30.10.2006 “PËR SISTEMIN E TAKSAVE VENDORE”

Në mbështetje të neneve 78, 83 pika 1, 155 dhe 157 pika 3 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Në ligjin nr.9632, datë 30.10.2006 “Për sistemin e taksave vendore”, bëhen këto ndryshime e shtesa:

Neni 1

Neni 12 “Regjistrimi dhe licencimi” ndryshohet si më poshtë:

“Neni 12
Regjistrimi dhe ndryshimet

1. Taksapaguesit, subjekte të këtij ligji, regjistrohen, për qëllime fiskale, pranë Qendrës Kombëtare të Regjistrimit, në përputhje me ligjin e posaçëm.
2. Ndryshimet në vendin e ushtrimit të veprimtarisë dhe të të dhënave të tjera tregtare kryhen sipas dispozitave të ligjit për Qendrën Kombëtare të Regjistrimit.
3. Ndryshimet e fushës së veprimtarisë së tatimpaguesve, subjekte të këtij ligji, deklarohen pranë bashkisë/komunës, brenda territorit të së cilës ushtrojnë veprimtarinë. Ministri i Financave, në bashkëpunim me ministrin që mbulon çështjet e pushtetit vendor, përcakton me udhëzim procedurat për deklarimin e këtyre ndryshimeve.”.

Neni 2

Pika 1 e nenit 13 “Detyrimi për informim” shfuqizohet.

Neni 3

Në nenin 17 “Kundërvajtjet dhe sanksionet” bëhen ndryshimet dhe shtesat e mëposhtme:

1. Në pikën 1 shkronja “a” fjalët “mosregjistrimi ose mosriregjistrimi i vendndodhjes së veprimtarisë ekonomike apo” shfuqizohen.
2. Shkronja “b” shfuqizohet.
3. Pika 3 ndryshohet si më poshtë:
“3. Nëse taksapaguesi nuk paguan taksën, gjobën dhe taksën shtesë, zyra e taksave vendos bllokimin e veprimtarisë, deri në çastin e kryerjes së pagesës. Nëse taksapaguesi vazhdon veprimtarinë, pavarësisht urdhrit të bllokimit, dënohet me sekuestrimin e pasurive në vendin e biznesit.”.
4. Pas pikës 3 shtohet pika 4 me këtë përmbajtje:
“4. Për mosregjistrimin e taksapaguesit apo mosdeklarimin e vendeve të ushtrimit të veprimtarisë zbatohet neni 49/1 i ligjit nr.8560, datë 22.12.1999 “Për procedurat tatimore në Republikën e Shqipërisë”, të ndryshuar.”.

Neni 4
Dispozitë kalimtare

Nenet 1 dhe 2 të këtij ligji hyjnë në fuqi më 1 shtator 2007.

Neni 5

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.5357, datë 15.6.2007 të Presidentit të Republikës së Shqipërisë, Alfred Moisiu

LIGJ
Nr.9747, datë 31.5.2007

PËR DISA NDRYSHIME NË LIGJIN NR.8088, DATË 21.3.1996
“PËR SHOQËRITË E BASHKËPUNIMIT RECIPROK”, TË NDRYSHUAR

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Në ligjin nr.8088, datë 21.3.1996 "Për shoqëritë e bashkëpunimit reciprok", të ndryshuar, bëhen këto ndryshime:

Neni 1

Në nenin 8 fjalia e dytë ndryshohet si më poshtë:

"Emërtimi i shoqërisë në shkresat, publikimet dhe të gjitha dokumentet e saj duhet të paraprihet nga fjalët "shoqëritë e bashkëpunimit reciprok", pas të cilave shënohet emri i saj dhe numri i regjistrimit, i marrë nga organi i ngarkuar me ligj të veçantë për regjistrimin e tyre."

Neni 2

Në nenin 52 paragrafi i parë ndryshohet si më poshtë:

"Kërkesa për regjistrimin e shoqërisë së bashkëpunimit reciprok duhet të bëhet nga kryetari i këshillit administrativ të shoqërisë dhe depozitohet pranë organit të ngarkuar me ligj të veçantë për regjistrimin. Aplikimi për regjistrimin e shoqërisë duhet të paraqitet së bashku me statutin e saj."

Neni 3

Në nenin 53 paragrafi i parë shfuqizohet.

Neni 4

Neni 54 ndryshohet si më poshtë:

"Neni 54

Shoqëria e bashkëpunimit reciprok regjistrohet pranë organit të ngarkuar me ligj të veçantë për regjistrimin e tyre.

Procedurat, afatet e regjistrimit dhe procedura ankimore kundër vendimit, që refuzon regjistrimin e shoqërisë së bashkëpunimit reciprok, rregullohen sipas procedurave të parashikuara me ligj të veçantë."

Neni 5

Ky ligj hyn në fuqi më 1 shtator 2007.

Shpallur me dekretin nr.5353, datë 14.6.2007 të Presidentit të Republikës së Shqipërisë, Alfred Moisiu

**LIGJ
Nr.9748, datë 31.5.2007**

**PËR NJË NDRYSHIM NË LIGJIN NR.7632, DATË 4.11.1992 "PËR DISPOZITAT QË
RREGULLOJNË PJESËN E PARË TË KODIT TREGTAR"**

Në mbështetje të neneve 78 e 83 pika 1 të Kushtetutës, me propozimin e Këshillit të Ministrave,

**K U V E N D I
I REPUBLIKËS SË SHQIPËRISË**

V E N D O S I:

Në ligjin nr.7632, datë 4.11.1992 "Për dispozitat që rregullojnë pjesën e parë të Kodit Tregtar", bëhet ky ndryshim:

Neni 1

Nenet 10, 13, 14, 15, 16, 17, 18, 19, 20, 21, 22, 23, 24 e 25 shfuqizohen.

Neni 2

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.5354, datë 14.6.2007 të Presidentit të Republikës së Shqipërisë, Alfred Moisiu

LIGJ
Nr. 9749, datë 4.6.2007

PËR POLICINË E SHTETIT

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

PJESA E PARË
DISPOZITA TË PËRGJITHSHME

Neni 1
Misioni

1. Policia e Shtetit Shqiptar, në vijim Policia, është shërbimi policor i Republikës së Shqipërisë.

2. Misioni i Policisë është të ruajë rendin dhe sigurinë publike, në përputhje me ligjin dhe duke respektuar të drejtat dhe liritë e njeriut.

Neni 2
Qëllimi

Qëllimi i këtij ligji është përcaktimi i normave dhe procedurave për pranimin, zhvillimin e karrierës dhe mbarimin e marrëdhënieve të punës në Polici, si edhe për garantimin e të drejtave, përcaktimin e detyrave dhe përgjegjësisë të punonjësve të Policisë, për garantimin e një shërbimi policor demokratik dhe profesional.

Neni 3
Juridiksioni i Policisë

Policia ushtron veprimtarinë në territorin e Republikës së Shqipërisë.

Neni 4
Përgjegjësitë e Policisë

1. Përgjegjësitë e Policisë janë si më poshtë:

- të mbrojnë jetën e njerëzve, sigurinë dhe pronën e tyre personale;
- të parandalojnë, të zbulojnë dhe të hetojnë, në përputhje me ligjin penal dhe me ligjin procedural penal, veprat penale dhe autorët e kryerjes së tyre;
- të mbrojnë rendin dhe sigurinë publike;
- ç) të mbikëqyrë dhe të drejtojnë trafikun rrugor në rrugë për përdorim publik, në përputhje me legjislacionin rrugor;
- të mbikëqyrë dhe të kontrollojnë kufijtë shtetërorë të Republikës së Shqipërisë;
- dh) të mbrojnë individë, mjedise dhe objekte të caktuara nga rreziqe të mundshme;
- të administrojnë dhe të mbrojnë informacionin e klasifikuar, me përjashtim të rasteve kur përcaktohet ndryshe në legjislacion;
- ë) të kryejnë detyrat e parashtruara në këtë ligj, në ligje të tjera, si dhe në aktet nënligjore, të cilat parashikojnë detyra për Policinë.

2. Çdo punonjës i Policisë ka për detyrë të përbushë të gjitha përgjegjësitë e përcaktuara në pikën 1 të këtij neni, pavarësisht se cilës strukturë i shërben.

3. Çdo punonjës i Policisë ka atributet e Policisë Gjyqësore, në përputhje me Kodin e Procedurës Penale dhe ligjin përkatës për organizimin dhe funksionimin e kësaj policie.

Neni 5

Simbolet e Policisë

1. Policia ka flamurin dhe stemën e vet të miratuar nga Këshilli i Ministrave.

2. Ngjyra, pajisjet e veçanta dhe shenjat në mjetet e Policisë përcaktohen me vendim të Këshillit të Ministrave.

3. Forma, përmasat dhe të dhënat që përmban dokumenti identifikues i punonjësit të Policisë përcaktohen me urdhër të Ministrit të Brendshëm, në vijim ministri.

Neni 6

Statusi i Policisë

1. Policia është institucion i administratës publike, strukturë e Ministrisë së Brendshme, në vijim ministria.

2. Statusi i Policisë nuk ndryshon edhe në gjendje lufte, gjendje të jashtëzakonshme apo fatkeqësie natyrore.

3. Policia është e depolitizuar.

Neni 7

Marrëdhëniet ndërmjet Policisë dhe ministrit

1. Ministri ka përgjegjësinë të sigurojë efektivitetin dhe eficientën e punës së Policisë. Në përgjegjësitë e ministrit nuk përfshihet drejtimi operacional i Policisë.

2. Përgjegjësitë e ministrit janë:

a) të përcaktojë objektivat strategjike vjetore për Policinë;

b) të caktojë objektivat e kryerjes së detyrave nga Policia;

c) të nxjerrë urdhra dhe udhëzime në përputhje me këtë ligj ose me ligje të tjera;

ç) të kërkojë raporte, informacione dhe dokumente të tjera, që lidhen me kryerjen e detyrave nga Policia në përgjithësi ose në lidhje me ndonjë çështje të veçantë.

3. Ministrit i raportohet çdo vit nga Drejtori i Përgjithshëm i Policisë rreth punës së Policisë.

4. Me kërkesën e tij, ministrit i raportohet nga Drejtori i Përgjithshëm i Policisë për çështje të përgjithshme ose të veçanta që lidhen me Policinë.

Neni 8

Ky ligj nuk parashikon që Policia t'i japë ministrit informacionet e mëposhtme:

informacione sekrete që kanë të bëjnë me identitetin, procesin e bashkëpunimit, të mbrojtjes ose vendndodhjen e dëshmitarëve, bashkëpunëtorëve të drejtësisë ose informatorëve;

informata konfidenciale të përfuara nga personat e përmendur në shkronjën "a" të këtij neni, informacione, për të cilat prokurori ka urdhëruar me shkrim që të konsultohen vetëm nga persona të caktuar.

Neni 9

Buxheti i Policisë

1. Policia ka buxhetin e saj, i cili është zë më vete në buxhetin e ministrisë, të miratuar nga Kuvendi. Drejtori i Përgjithshëm i Policisë është përgjegjës për menaxhimin efektiv dhe eficient të

buxhetit të miratuar.

2. Auditimi i buxhetit të Policisë kryhet nga organet e përcaktuara me ligj.

Neni 10 **Fonde të veçanta**

1. Buxheti i Policisë ka një zë të veçantë për pagesën e personave për rastet e operacioneve të veçanta policore dhe për informatorët.

2. Këto fonde administrohen nga Drejtori i Përgjithshëm i Policisë, në bazë të rregullave dhe kriterëve të përcaktuara me udhëzim të ministrit.

Neni 11 **Përkufizime**

1. Personeli i Policisë

Ka dy kategori të personelit të Policisë:

punonjësit e Policisë, që kanë kompetenca operacionale të plota, përfshirë kompetencat e ndalimit dhe të arrestimit. Ata mund të jenë punonjës policie me ose pa uniformë;

punonjësit në shërbimet mbështetëse, që janë emëruar në Polici pa u diplomuar në Akademinë e Policisë ose që nuk kanë ndjekur ndonjë trajnim tjetër policor të miratuar.

2. Lirimi dhe përjashtimi nga puna

Lirim nga Policia do të thotë një situatë, në të cilën marrëdhëniet juridike dhe administrative të punonjësit të Policisë me institucionin e Policisë së Shtetit ndërpriten për arsye, të cilat nuk ia heqin përgjithmonë të drejtën për t'u rikthyer në Polici.

Përjashtim nga Policia do të thotë një situatë, në të cilën marrëdhëniet juridike dhe administrative të punonjësit të Policisë me institucionin e Policisë së Shtetit ndërpriten pa asnjë mundësi rikthimi në Polici.

3. Ekzekutimi i menjëhershëm

Një veprim i ndërmarrë nga një punonjës policie sapo kupton rrezikun, pa urdhrin e eprorit.

4. Masat për ruajtjen e rendit

Masat për ruajtjen e rendit dhe sigurisë publike përfshijnë tërësinë e veprimeve të ligjshme, të cilat duhet të kryhen nga punonjësi i Policisë, duke filluar nga forma verbale e bindjes deri te përdorimi i forcës vdekjeprurëse, për rivendosjen e rendit, në përputhje me legjislacionin dhe duke marrë parasysh moshën dhe gjendjen e individit.

5. Strukturat e Kufirit dhe Migracionit

Të gjitha nenet në ligj, që u referohen drejtimit dhe kontrollit, verifikimit, hartimit të raporteve vjetore dhe të veçanta ose kompetencave për të transferuar personelin, të zbatueshme për drejtuesit e drejtorive të qarkut, komisarivateve dhe stacioneve të Policisë, do t'u referohen gjithashtu drejtuesve të drejtorive, komisarivateve dhe stacioneve të Policisë së Kufirit dhe Migracionit.

6. Shoqërimi

Shoqërimi, në kuptimin e këtij ligji, nënkupton rastin kur një person ka shkelur një rregull administrativ dhe identifikimi i tij krijon nevojën e shoqërimit në zyrat e policisë me ose pa vullnetin e tij.

7. Akademia e Policisë

Akademia e Policisë është një term përgjithësues, i përdorur në këtë ligj për të nënkuptuar të gjitha elementet e kualifikimit policor: Shkollën Bazë të Policisë, trajnimin e specializuar, trajnimin e drejtuesve etj.

PJESA E DYTË
ORGANIZIMI I POLICISË

KREU I
STRUKTURA

Neni 12

Organizimi dhe struktura e përgjithshme e Policisë

1. Policia organizohet në nivel qendror dhe vendor. Drejtoria e Përgjithshme përbën nivelin qendror të Policisë, ndërsa drejtoritë e Policisë së qarqeve, drejtoritë rajonale të Kufirit dhe Migracionit dhe strukturat në varësi të tyre përbëjnë nivelin vendor të saj.

2. Këshilli i Ministrave, me propozimin e ministrit, përcakton numrin e përgjithshëm të punonjësve të Policisë.

3. Struktura e Drejtorisë së Përgjithshme të Policisë dhe e sektorëve të saj, ku përfshihen drejtoritë e Policisë së qarqeve, drejtoritë rajonale të Kufirit dhe Migracionit, komisariatet, komisariatet e Kufirit dhe Migracionit, stacionet e Policisë dhe stacionet e Kufirit dhe Migracionit, si dhe limiti i organikës së këtyre strukturave, miratohen nga ministri, me propozim të Drejtorit të Përgjithshëm të Policisë.

Neni 13

Drejtoria e Përgjithshme e Policisë

1. Drejtoria e Përgjithshme e Policisë drejtohet nga Drejtori i Përgjithshëm i Policisë dhe e ka vendndodhjen në Tiranë.

2. Drejtoria e Përgjithshme e Policisë përbëhet nga departamente, sipas fushave përkatëse.

3. Drejtoria e Përgjithshme e Policisë:

a) mbikëqyr kryerjen e funksioneve dhe detyrave të Policisë nga drejtoritë e policisë në qarqe;

b) bashkërendon çështjet që lidhen me rekrutimin dhe trajnimin e punonjësve të Policisë;

c) bashkërendon vënien në zbatim të strategjive për parandalimin dhe reduktimin e krimit, ruajtjen e rendit publik, mbikëqyrjen dhe, kontrollin e kufijve shtetërorë dhe, në bashkëpunim me institucionet përkatëse, ruajtjen e sigurisë kombëtare;

ç) bashkërendon kryerjen e funksioneve dhe të detyrave të Policisë;

d) bashkërendon vënien në zbatim të marrëveshjeve ndërkombëtare për çështje që lidhen me Policinë;

dh) përpunon të dhënat e mbledhura nga Policia deri në masën që është e nevojshme për përmbushjen e funksioneve të Policisë;

e) kryen detyra policore, në përputhje me këtë ligj, me ligje të tjera dhe me aktet normative të bazuara në këtë ligj ose në ligje të tjera.

4. Drejtoria e Përgjithshme e Policisë mund t'i propozojë Grupit të Politikave:

a) udhëzimet organizative, që lidhen me personelin, si dhe ato që janë thelbësore për operacionet e Policisë, përfshirë formimin e njësisve speciale për kryerjen, sipas rastit, të detyrave të veçanta;

b) strategjitë për parandalimin dhe reduktimin e krimit, ruajtjen e rendit publik, mbikëqyrjen dhe kontrollin e kufijve shtetërorë dhe, në bashkëpunim me institucionet përkatëse, ruajtjen e sigurisë kombëtare;

c) planet financiare vjetore dhe afatgjata për Policinë.

Neni 14

Drejtoritë e Policisë së qarqeve

1. Në çdo qark funksionon drejtoria e Policisë së qarkut, përveç ndarjeve të përcaktuara në

nenin 19 të këtij ligji.

2. Numri i personave që punojnë në drejtorinë e Policisë së qarkut dhe specialitetet e tyre caktohen nga Drejtoria e Përgjithshme e Policisë, sipas nevojave të secilit qark, pas këshillimit me drejtorin e Policisë së qarkut.

3. Drejtoria e Policisë së qarkut mbështet dhe mbikëqyr çështjet operacionale policore, të ndërmarra nga komisaritet dhe stacionet e Policisë, të cilat përfshihen në qarkun që ajo drejton.

4. Drejtoria e Policisë së qarkut:

a) ushtron funksionet dhe detyrat specifike të përcaktuara në ligj dhe në udhëzimet e nxjerra nga Drejtoria e Përgjithshme e Policisë, sipas nenit 13 pika 3 shkronja “a” të këtij ligji;

b) mbikëqyr kryerjen e funksioneve dhe detyrave të Policisë nga çdo komisaritet dhe stacion policie në qarkun e Policisë që ajo mbulon;

c) bashkërendon çështjet e personelit dhe të trajnimit që lidhen me komisaritet dhe stacionet e Policisë në qarkun e Policisë që ajo mbulon.

Neni 15 **Komisariatet**

1. Çdo drejtori e Policisë së qarkut përbëhet nga komisaritate.

2. Numri i komisaritateve brenda drejtorisë së Policisë së qarkut dhe numri e specialiteti i personave që punojnë në këto komisaritate reflekton kërkesat për policim në zonë dhe miratohet me urdhër të Drejtorit të Përgjithshëm të Policisë.

3. Komisariteti ndërmerr detyra operacionale, në përputhje me funksionet e Policisë.

Neni 16 **Stacionet e Policisë**

Stacionet e Policisë ngrihen dhe funksionojnë me urdhër të Drejtorit të Përgjithshëm të Policisë dhe me propozimin e drejtorit të qarkut në zona të caktuara gjeografike, brenda territorit të një komisariteti.

Neni 17 **Verifikimi nga Drejtoria e Përgjithshme e Policisë**

1. Drejtoria e Përgjithshme e Policisë, kur ka të dhëna se një drejtori e Policisë së qarkut nuk po i kryen ose nuk i ka kryer detyrat si duhet ose në kohën e duhur, ajo ka detyrimin të verifikojë moskryerjen e detyrës.

2. Nëse nga verifikimi, sipas pikës 1 të këtij neni, dyshimet vërtetohen, Drejtoria e Përgjithshme e Policisë njofton drejtorin e drejtorisë së Policisë së qarkut për moskryerjen e detyrës dhe merr masa si më poshtë:

a) urdhëron drejtorin e Policisë së qarkut të ndreqë, brenda një kohe të caktuar, pasojat e ardhura nga moskryerja e detyrës;

b) identifikon masat e mundshme për të ndrequr pasojat e moskryerjes dhe i kërkon drejtorit të Policisë së qarkut t'i zbatojë ato;

c) ndreq pasojat me nismën e vet dhe zbaton masa të veçanta, të cilat mund të jenë gjithashtu në kompetencën e drejtorisë së Policisë së qarkut.

Neni 18 **Verifikimi**

Verifikimet kryhen nga çdo strukturë e lartë ndaj strukturave më të ulëta, brenda juridiksionit të saj lëndor dhe territorial.

Neni 19

Departamenti i Kufirit dhe Migracionit

Departamenti i Kufirit dhe Migracionit vendoset në Tiranë.

Departamenti i Kufirit dhe Migracionit drejton dhe ushtron kontroll mbi të gjitha strukturat vartëse të Kufirit dhe Migracionit. Për qëllime të mbikëqyrjes dhe të kontrollit të kufijve, Republika e Shqipërisë ndahet në rajone; për çdo rajon ka një drejtor rajonale të Kufirit dhe Migracionit. Numri i drejtorive rajonale, komisariateve dhe stacioneve të Kufirit dhe Migracionit përcaktohet nga ministri, me propozimin e Drejtorit të Përgjithshëm të Policisë dhe Zëvendësdrejtorit të Përgjithshëm të Policisë për Kufirin dhe Migracionin.

Departamenti i Policisë së Kufirit dhe Migracionit:

a) mbështet Zëvendësdrejtorin e Përgjithshëm të Policisë për Kufirin dhe Migracionin në kryerjen e detyrave;

b) mbikëqyr kryerjen e detyrave nga drejtoritë rajonale të Kufirit dhe Migracionit në varësi të tij, si dhe nga çdo njësi vartëse që raporton drejtpërdrejt tek ai;

c) në raste të veçanta mbikëqyr kryerjen e detyrave nga ndonjë tjetër njësi vartëse e Kufirit dhe Migracionit.

Departamenti i Kufirit dhe Migracionit i propozon Grupit të Politikave:

strukturën organizative për personelin, si dhe udhëzime të tjera për operacionet e Departamentit të Kufirit dhe Migracionit dhe të strukturave të tij vartëse;

strategjitë për mbikëqyrjen dhe kontrollin e kufijve shtetërorë;

planet financiare vjetore dhe afatgjata për Departamentin e Kufirit dhe Migracionit dhe strukturave të tij vartëse.

5. Pas miratimit të Drejtorisë së Përgjithshme të Policisë, Departamenti i Kufirit dhe Migracionit bashkërendon punën për vënien në zbatim të politikave dhe strategjive që, në mënyrë të veçantë, lidhen me:

a) rekrutimin e punonjësve të Policisë në Departamentin e Kufirit dhe Migracionit dhe strukturave të tij vartëse dhe trajnimin e tyre;

b) mbikëqyrjen dhe kontrollin e kufijve shtetërorë;

c) kryerjen e funksioneve dhe detyrave të Departamentit të Kufirit dhe Migracionit dhe të strukturave të tij vartëse;

ç) vënien në zbatim të marrëveshjeve ndërkombëtare për çështje që lidhen me Departamentin e Kufirit dhe Migracionit dhe strukturave të tij vartëse.

6. Departamenti i Kufirit dhe Migracionit dhe strukturat vartëse të tij mbledhin dhe përpunojnë të dhëna të nevojshme për përmbushjen e funksioneve të tyre.

KREU II

FUNKSIONET

Neni 20

Drejtori i Përgjithshëm i Policisë

1. Drejtori i Përgjithshëm i Policisë emërohet nga Këshilli i Ministrave, bazuar në propozimet e paraqitura nga ministri.

2. Drejtori i Përgjithshëm i Policisë është autoriteti më i lartë administrativ, teknik dhe operacional i Policisë.

3. Drejtori i Përgjithshëm i Policisë:

a) drejton dhe kontrollon Policinë;

b) i rekomandon ministrit, para fillimit të vitit financiar, buxhetin që do t'i jepet në atë vit financiar;

c) ndan buxhetin mes departamenteve, drejtorive, sektorëve, komisariateve dhe stacioneve të Policisë, sipas përparësive të vendosura nga ministri;

ç) menaxhon dhe është përgjegjës për buxhetin e miratuar për Policinë.

Neni 21

Kriteret për emërimin e Drejtorit të Përgjithshëm të Policisë

Drejtor i Përgjithshëm i Policisë emërohet personi që përmbush këto kritere:

- a) të ketë shërbyer për një periudhë të paktën 3 vjet me gradën “Drejtues i Parë” ose më lart ose ekuivalentin e kësaj grade;
- b) të jetë shkolluar në Akademinë e Policisë, në përputhje me nenin 50 të këtij ligji ose të ketë mbaruar shkollë, të miratuar sipas ligjit për arsimin e lartë, si të barasvlershme me nivelin e shkollimit që përputhet me nenin 51 të këtij ligji;
- c) të ketë kryer jo më pak se 16 vjet shërbim si punonjës Policie, duke ushtruar kompetenca policore brenda 20 viteve të fundit.

Neni 22

Qëndrimi në detyrë i Drejtorit të Përgjithshëm të Policisë

1. Drejtori i Përgjithshëm i Policisë emërohet për një periudhë kohe prej 5 vjetësh, me të drejtë riemërimi për një periudhë prej 3 vjetësh.
2. Në rast se Drejtori i Përgjithshëm i Policisë nuk riemërohet ose plotëson 8 vjet qëndrimi në detyrë, ai rikthehet në gradën dhe funksionin që mbante para emërimit si Drejtor i Përgjithshëm i Policisë ose, në pamundësi, në një funksion të barasvlershëm me të, sikurse përcaktohet në nenin 21 të këtij ligji.

Neni 23

Zëvendësdrejtori i Përgjithshëm i Policisë

1. Çdo departament i Drejtorisë së Përgjithshme të Policisë drejtohet nga një Zëvendësdrejtor i Përgjithshëm i Policisë, sikurse përcaktohet në nenin 13 të këtij ligji.
2. Zëvendësdrejtorët e përgjithshëm të Policisë emërohen, lirohen, largohen nga ministri me propozimin e Drejtorit të Përgjithshëm të Policisë.
3. Roli dhe funksionet e zëvendësdrejtorëve të përgjithshëm të Policisë përcaktohen në rregulloren specifike të nxjerrë për këtë qëllim nga Drejtori i Përgjithshëm i Policisë dhe të miratuar nga ministri.
4. Zëvendësdrejtori i Përgjithshëm i Policisë:
 - a) ndihmon Drejtorin e Përgjithshëm të Policisë në kryerjen e funksioneve në departamentin që ai drejton;
 - b) drejton dhe ushtron kontroll të drejtpërdrejtë mbi punonjësit e Policisë, të emëruar në departament;
 - c) i propozon Drejtorit të Përgjithshëm të Policisë, përpara fillimit të çdo viti financiar, pjesën e buxhetit të miratuar nga Kuvendi për Policinë që do t'i jepet veçanërisht departamentit të tij për atë vit financiar;
 - ç) menaxhon dhe përgjigjet për buxhetin e dhënë për departamentin e tij nga Drejtori i Përgjithshëm i Policisë.

Neni 24

Kriteret për emërimin e zëvendësdrejtorëve të përgjithshëm të Policisë

1. Sipas nenit 23 pika 2 të këtij ligji, Zëvendësdrejtor i Përgjithshëm i Policisë emërohet personi që përmbush këto kritere:
 - a) të ketë shërbyer për një periudhë të paktën prej 3 vjetësh në gradën e “Drejtuesit të Parë” ose një gradë të barasvlershme me të;
 - b) të jetë shkolluar në Akademinë e Policisë, në përputhje me nenin 50 të këtij ligji ose të ketë mbaruar një shkollë të miratuar sipas ligjit për arsimin e lartë, si të barasvlershme me nivelin e shkollimit që përputhet me nenin 51 të këtij ligji;

- c) të ketë kryer jo më pak se 15 vjet shërbimi në Polici brenda 20 viteve të fundit.
2. Personi, i cili aplikon për postin e Zëvendës drejtorit të Përgjithshëm të Policisë për Kufirin dhe Migracionin duhet, sipas pikës 1 shkronja “a” të këtij neni, të ketë shërbyer në Departamentin e Kufirit dhe Migracionit për një periudhë kohe të paktën 2 vjet me gradën e “Drejtuesit” ose më lart ose me një gradë të barasvlershme.

Neni 25

Qëndrimi në detyrë i Zëvendës drejtorit të Përgjithshëm të Policisë

1. Zëvendës drejtori i Përgjithshëm i Policisë emërohet për një periudhë katërvjeçare me të drejtë riemërimi edhe për një periudhë trevjeçare.
2. Në rast se Zëvendës drejtori i Përgjithshëm i Policisë nuk riemërohet ose plotëson 7 vjet qëndrimi në detyrë, ai rikthehet në gradën e mëparshme dhe me të njëjtat kushte që ka pasur para emërimit të tij si Zëvendës drejtor i Përgjithshëm i Policisë, sikurse përcaktohet në nenin 24 të këtij ligji.

Neni 26

Largimi nga detyra i Drejtorit të Përgjithshëm të Policisë dhe i zëvendës drejtorëve të përgjithshëm të Policisë

- Drejtori i Përgjithshëm i Policisë ose Zëvendës drejtori i Përgjithshëm i Policisë mund të largohet nga detyra nga autoriteti që i ka emëruar, për një nga arsyet e mëposhtme:
- është dënuar për një vepër penale me vendim gjyqësor të formës së prerë;
 - ka kryer shkelje të disiplinës, sipas Rregullores së Disiplinës të nxjerrë në zbatim të këtij ligji, që cakton si masë largimin nga detyra;
 - për mospërbushje të objektivave strategjike dhe objektivave të kryerjes së detyrave të caktuara nga ministri, sipas nenit 7 pika 2 shkronjat “a” dhe “b” të këtij ligji;
 - ç) është i paaftë nga ana shëndetësore për një periudhë kohe mbi 6 muaj;
 - plotëson moshën për pension;
 - dh) jep dorëheqjen.

Neni 27

Autoriteti për të vepruar në emër të Drejtorit të Përgjithshëm të Policisë

1. Ministri cakton njërin nga zëvendës drejtorët e përgjithshëm të Policisë që të ushtrojë kompetencat dhe detyrat e Drejtorit të Përgjithshëm të Policisë:
- në mungesë, në rast paaftësie ose pezullimi nga detyra të Drejtorit të Përgjithshëm të Policisë;
 - kur Drejtori i Përgjithshëm i Policisë nuk është emëruar ende;
 - në raste të tjera, me miratimin e Drejtorit të Përgjithshëm të Policisë.
2. Zëvendës drejtori i Përgjithshëm i Policisë, i caktuar sipas pikës 1 shkronjat “a” e “b” të këtij neni, nuk mund të ushtrojë kompetencat e Drejtorit të Përgjithshëm për një periudhë të pandërprerë për gjashtë muaj.

Neni 28

Drejtoritë në varësi të Drejtorisë së Përgjithshme të Policisë

Të gjithë drejtorët e drejtorive në varësi të Drejtorisë së Përgjithshme të Policisë raportojnë te Zëvendës drejtori i Përgjithshëm i Policisë të departamentit përkatës.

Neni 29
Menaxhimi i përbashkët

1. Menaxhimi i përbashkët realizohet nga Grupi i Politikave.
2. Grupi i Politikave përbëhet nga Drejtori i Përgjithshëm i Policisë, zëvendësrektorët e përgjithshëm të Policisë dhe drejtorët e Drejtorisë së Përgjithshme të Policisë.
3. Grupi i Politikave drejtohet nga Drejtori i Përgjithshëm i Policisë.
4. Grupi i Politikave nuk është organ ekzekutiv. Ai është organi më i lartë këshillues i Policisë së Shtetit për të gjitha çështjet që kanë të bëjnë me:
 - a) buxhetin;
 - b) vendimet e Drejtorisë së Përgjithshme të Policisë, që përfshijnë më shumë se një departament;
 - c) zhvillimin e politikave, të cilat ndikojnë në mënyrën se si Policia bashkëpunon me publikun;
 - ç) kryerjen e detyrave të drejtorive brenda strukturave të Policisë.Ai është organ këshillimor për Drejtorin e Përgjithshëm të Policisë në ushtrimin e detyrave për zhvillimin e politikave dhe çdo vendimi që ka lidhje me çështje të përbashkëta financiare, të personelit dhe të logjistikës.
5. Grupi i Politikave shqyrton propozimet që i paraqiten nga Drejtoria e Përgjithshme e Policisë, sipas nenit 13 të këtij ligji dhe nga Drejtoria Qendrore e Departamentit të Kufirit dhe Migracionit, sipas nenit 19 të këtij ligji.
6. Grupi i Politikave mbledhet të paktën një herë në muaj. Struktura dhe procedurat e këtyre takimeve përcaktohen në rregulloret e nxjerra nga Drejtori i Përgjithshëm i Policisë.

Neni 30
Drejtori i Policisë së qarkut

1. Çdo drejtori e Policisë së qarkut drejtohet dhe kontrollohet nga drejtori i Policisë së qarkut.
2. Drejtori i Policisë së qarkut dhe drejtori rajonal i Kufirit dhe Migracionit raportojnë te Drejtori i Përgjithshëm i Policisë, nëpërmjet Zëvendësrektorit të Përgjithshëm të Policisë, për:
 - a) kryerjen e detyrave;
 - b) kryerjen e detyrave nga drejtoria e Policisë së qarkut, komisariatet dhe stacionet e Policisë që drejton dhe kontrollon.
3. Drejtori i Policisë së qarkut i paraqet Drejtorit të Përgjithshëm të Policisë një raport vjetor ose sa herë që Drejtori i Përgjithshëm i Policisë bën kërkesë për punën e drejtorisë së Policisë së qarkut, të cilën ai drejton dhe kontrollon dhe punën e komisariateve dhe stacioneve të Policisë në varësinë e saj.
4. Drejtori i Policisë së qarkut raporton te Drejtori i Përgjithshëm i Policisë, me kërkesë të tij, për çdo çështje të përgjithshme ose të veçantë të drejtorisë së Policisë së qarkut që drejton.

Neni 31
Shefi i komisariatit

1. Komisariati drejtohet nga shefi i komisariatit, i cili emërohet nga Drejtori i Përgjithshëm i Policisë.
2. Shefi i komisariatit raporton te drejtori i Policisë së qarkut, nën varësinë e të cilit është komisariati.
3. Shefi i komisariatit duhet të paraqesë një raport vjetor te drejtori i Policisë përkatëse të qarkut për punën e komisariatit që ai drejton.

Neni 32
Shefi i stacionit të Policisë

1. Stacioni i Policisë drejtohet nga shefi i stacionit, i cili emërohet nga Drejtori i Përgjithshëm i Policisë.
2. Shefi i stacionit i raporton shefit të komisariatit, ku ndodhet stacioni, për kryerjen e detyrave të tij dhe të stacionit të cilin ai drejton.

KREU III
GRADAT NË POLICI

Neni 33
Sistemi i gradave

1. Sistemi i gradave përcakton hierarkinë, nivelet e administrimit, si dhe pasqyron marrëdhëniet ndërmjet funksioneve në Polici.
2. Sistemi i gradave, sipas këtij ligji, paraqitja, forma, emërtimet dhe mbajtja e tyre janë e drejtë vetëm e Policisë.

Neni 34
Kuptimi për nivelet dhe gradat

1. Nivelet pasqyrojnë nivelin e organizimit, drejtimit, kontrollit dhe kryerjes së detyrave në Polici, si dhe tregojnë pozitën e punonjësve të Policisë në strukturën e administratës së saj.
2. Gradat shprehin pozitën që ka punonjësi në strukturën hierarkike të Policisë.

Neni 35
Nivelet

- Emërtimet e niveleve në Polici, sipas hierarkisë, janë:
- a) punonjës policie i nivelit zbatues, që përfaqëson nivelin bazë të veprimit policor;
 - b) punonjës policie i nivelit të parë drejtues, që përfaqëson drejtimin dhe veprimin operacional;
 - c) punonjës policie i nivelit të mesëm drejtues, që përfaqëson drejtimin ekzekutiv qendror dhe/ose vendor;
 - ç) punonjës policie i nivelit të lartë drejtues, që përfaqëson drejtimin strategjik.

Neni 36
Gradat

1. Emërtimet e gradave, sipas niveleve dhe ecurisë në karrierë, janë:
 - a) Punonjës policie i nivelit zbatues:
 - i) Nëninspektor;
 - ii) Inspektor;
 - iii) Kryeinspektor.
 - b) Punonjës policie i nivelit të parë drejtues:
 - i) Nënkomisar;
 - ii) Komisar;
 - iii) Kryekomisar.
 - c) Punonjës policie i nivelit të mesëm drejtues:
 - i) Drejtues;
 - ii) Drejtues i Parë.
 - ç) Punonjës policie i nivelit të lartë drejtues:

- i) Zëvendësdirjtor i Përgjithshëm;
- ii) Dirjtor i Përgjithshëm.

2. Gradat, sipas pikës 1 shkronja “ç” të këtij neni, janë funksionale. Këto grada merren nga punonjësi i Policisë në çastin e emërimit në detyrat e Dirjtorit ose Zëvendësdirjtorit të Përgjithshëm të Policisë, sipas neneve 20 pika 1 dhe 23 pika 2 të këtij ligji dhe lihen me largimin nga këto detyra. Në këto raste punonjësi i Policisë rimerr gradën “Dirjtues i Parë” dhe vjetërsia në gradë, gjatë kohës që ka pasur funksionet e përcaktuara në pikën 1 shkronja “ç” të këtij neni, llogaritet si vjetërsi në këtë gradë.

Neni 37

Hierarkia e niveleve dhe gradave

1. Hierarkia midis punonjësve të Policisë në nivele përcaktohet sipas kësaj renditjeje: Dirjtor i përgjithshëm, drejtues, komisar, inspektor.
2. Brenda të njëjtin nivel, hierarkia e punonjësve të Policisë përcaktohet nga grada.
3. Hierarkia e punonjësve të Policisë me të njëjtën gradë përcaktohet nga funksioni, ndërsa për funksione të njëjta hierarkia përcaktohet nga vjetërsia në gradë.

Neni 38

Paraqitja e gradave

Paraqitja, forma dhe ndërtimi i gradave miratohen me vendim të Këshillit të Ministrave, pas zhvillimit të një procesi konkurrimi për dizenjimin e tyre.

Neni 39

Përcaktimi i funksioneve për gradë

Tabela e funksioneve korresponduese për çdo gradë përcaktohet me vendim të Këshillit të Ministrave.

Neni 40

Kalimi në nivelin pasardhës

Punonjësi i Policisë kalon nga një nivel në tjetrin vetëm pas përfundimit të shkollimit përkatës, në çastin e marrjes së gradës më të ulët të nivelit pasardhës.

Neni 41

Ngritja në gradë

1. Ngritjet në gradë nga “Inspektor” deri në “Dirjtues i Parë” bëhen nëpërmjet pjesëmarrjes në një proces vlerësimi konkurrues, që përfshin raportet e vlerësimit të punës dhe një provimi, i cili teston aftësitë e aplikantëve për të marrë gradën pasardhëse. E drejta për të marrë pjesë në këtë proces përcaktohet në pikën 4 të këtij neni.

2. Me përjashtim të punonjësve të Policisë, sipas pikës 3 të këtij neni, grada “Nëninspektor” i jepet kursantit pas përfundimit me sukses të periudhës së shkollimit në Shkollën Bazë të Policisë. Kjo gradë, e cila i jep punonjësit kompetenca të plota policore, mbahet nga punonjësi i Policisë gjatë periudhës së provës.

3. Punonjësit e Policisë, të cilët konkurrojnë dhe hyjnë në Shkollën Bazë të Policisë, do të mbajnë gradën dhe pagën e tyre ekzistuese si gjatë kursit, ashtu edhe pas përfundimit të tij. Nëse punonjësi nuk e kalon kursin, ai e mban gradën dhe merr pagën përkatëse derisa të gjithë punonjësit e nivelit zbatues të kenë ndjekur Shkollën Bazë të Policisë, kohë në të cilën ai lirohet nga Policia.

4. Ngritja në gradën “Inspektor” bëhet pas përfundimit me sukses të periudhës dyvjeçare të provës, e cila pason Shkollën Bazë të Policisë.

5. a) Punonjësit të Policisë i lind e drejta të aplikojë për të konkurruar në procesin e përzgjedhjes, pas plotësimit të kohës së qëndrimit në gradë, sipas afateve të mëposhtme:

i) nga “Inspektor” në “Kryeinspektor”	2 vjet
ii) nga “Kryeinspektor në “Nënkomisar”	2 vjet
iii) nga “Nënkomisar në “Komisar”	3 vjet
iv) nga “Komisar në “Kryekomisar”	3 vjet
v) nga “Kryekomisar në “Drejtues”	3 vjet
vi) nga “Drejtues në “Drejtues i Parë”	4 vjet
vii) nga “Drejtues i Parë” në “Zëvendësdrejtor i Përgjithshëm”	4 vjet
viii) nga “Zëvendësdrejtor i Përgjithshëm” në “Drejtor i Përgjithshëm”	pa afat kohor

b) Punonjësit e Policisë që kanë përfunduar një shkollë të lartë të njohur nga shteti dhe që kanë plotësuar së paku dy të tretat e minimumit të kohës që kërkohet për qëndrimin në gradë, mund të konkurrojnë në procesin e përzgjedhjes për ngritjen në gradë nga “Inspektor” në “Kryeinspektor” dhe nga “Kryeinspektor” në “Nënkomisar”.

c) Në vjetërsinë për efekt gradimi llogaritet edhe koha e ndërprerjes së karrierës për shkak të:

i) paaftësisë së përkohshme shëndetësore, si pasojë e sëmundjes apo dëmtimit për shkak të punës;

ii) paaftësisë shëndetësore, e cila nuk ka ardhur si pasojë e punës deri në 6 muaj brenda afatit 12-mujor;

iii) ushtrimin të funksioneve, sipas nenit 45 të këtij ligji;

iv) pezullimit apo përjashtimit për shkaqe disiplinore, si rezultat i një urdhri ose vendimi të paligjshëm dhe/ose të padrejtë;

v) pezullimit me pagesë deri në përfundimin e hetimit të një kallëzimi ose një ankese për sjellje në kundërshtim me Rregulloren e Disiplinës, derisa autoriteti kompetent të marrë vendimin përfundimtar për çështjen.

ç) Në vjetërsinë për efekt gradimi nuk llogaritet koha e ndërprerjes së karrierës për shkak të:

i) lejes së përfituar pa të drejtë pagese;

ii) pezullimeve për shkaqe disiplinore.

6. Punonjësi i Policisë ka të drejtë të ankohet te Drejtori i Përgjithshëm i Policisë, në përputhje me Kodin e Procedurave Administrative, në rastet kur konstaton shkelje të rregullave të ngritjes në gradë, të përcaktuara në këtë nen dhe në Rregulloren e Personelit në zbatim të këtij ligji, të miratuar nga Këshilli i Ministrave.

7. Procedurat për kryerjen e provimeve të ngritjes në gradë përcaktohen në Rregulloren e Personelit të Policisë dhe përfshijnë:

a) përbërjen e komisioneve të testimit;

b) procedurat e aplikimit;

c) kriteret për të aplikuar;

ç) strukturën e provimeve për ngritje në gradë;

d) përcaktimin dhe kohëzgjatjen e listës emërore, sipas radhës, të personave që kanë të drejtë të ndjekin kursin për ngritje në gradë.

Neni 42

Fitimi i gradës

1. a) Ngritja në gradë e punonjësit të Policisë nënkupton ngritjen e tij në detyrë, sipas tabelës së funksioneve korresponduese për çdo gradë, sipas nenit 39 të këtij ligji. Ngritjet në gradë bëhen vetëm për të plotësuar vendet e lira për çdo gradë. Në urdhrin për ngritje në gradë, autoriteti përgjegjës përcakton gjithashtu funksionin përkatës të punonjësit të Policisë.

b) Punonjësit e Policisë mund të ngrihen në gradë vetëm pasi të kenë përfunduar me sukses kursin e trajnimit përkatës për atë gradë.

c) Punonjësit e Policisë zgjidhen për të ndjekur kursin e trajnimit, duke u bazuar në listën

emërore të së drejtës për gradë, të hartuar pas procesit konkurrues.

ç) Pas përfundimit me sukses të trajnimit, përzgjedhja për ngritje në gradë bëhet sipas listës emërore të së drejtës për gradë, të përcaktuar në pikën 1 shkronja “c” të këtij neni.

2. a) Ngritja në gradën “Inspektor” kryhet me urdhër të drejtorit të Policisë së qarkut, sipas kriterëve të përcaktuara në nenin 41 pika 4 të këtij ligji.

b) Ngritja në gradën e “Kryeinspektorit” dhe të gjitha gradat në nivelin e parë dhe të mesëm drejtues bëhen me urdhër të Drejtorit të Përgjithshëm të Policisë, sipas kriterëve të përcaktuara në nenin 41 të këtij ligji.

c) Ngritja në gradën e nivelit të lartë drejtues bëhet në përputhje me nenet 20 pika 1 dhe 23 pika 2 të këtij ligji.

3. a) Numri i përllogaritur për vendet e lira njoftohet brenda datës 31 mars të çdo viti.

b) Kuotat e pranimit në trajnim për secilën gradë përcaktohen nga Drejtori i Përgjithshëm i Policisë, por nuk kalojnë:

5 për qind mbi vendet e lira të përllogaritura për ngritjen në gradën e “Kryeinspektorit”;

10 për qind mbi vendet e lira të përllogaritura për gradat e nivelit të parë drejtues;

15 për qind mbi vendet e lira të përllogaritura për gradat e nivelit të mesëm drejtues.

Neni 43

Heqja dorë nga grada

1. Punonjësi i Policisë ka të drejtë të kërkojë të heqë dorë nga grada që mban për të kaluar në një gradë më të ulët.

2. Heqja dorë nga grada, sipas pikës 1 të këtij neni, mund të kërkohet vetëm për një gradë paraardhëse dhe jo më shumë se në dy raste gjatë karrierës policore të punonjësit të Policisë.

3. Vendimi për kërkesën e punonjësit të Policisë për heqje dorë nga grada merret nga autoriteti përkatës, që përcaktohet në nenin 42 pika 1 të këtij ligji.

4. Punonjësi i Policisë, i cili më parë ka hequr dorë me kërkesën e vet nga një gradë, ka të drejtë të kërkojë ngritje në gradë vetëm pas certifikimit nga komisioni i testimit dhe sipas procedurave të përcaktuara në nenet 41 dhe 42 të këtij ligji.

Neni 44

Ulja në gradë

1. Me përjashtim të nivelit zbatues, kur për shkak të ndryshimeve në strukturën organizative të Policisë shkurtrohet numri i funksioneve organike për gradë, punonjësi i Policisë, që mban gradën ku do të kërkohet ulja, mund të kërkojë në mënyrë vullnetare uljen një gradë më poshtë, kur ka vende të lira.

2. Me krijimin e vendeve të lira për gradë, punonjësi i Policisë, që ka kërkuar uljen në gradë, rimerr brenda 2 vjetësh gradën e mëparshme, sipas të njëjtit kriter të përcaktuar në pikën 1 të këtij neni.

Neni 45

Ruajtja e gradës

Punonjësi i Policisë, që punësohet në struktura të tjera të administratës publike, në funksione që kanë për objekt çështje të rendit e të sigurisë publike, si dhe kur ai shërben në një organizatë ndërkombëtare, që mbulon çështje të rendit dhe të sigurisë publike, rikthehet në të njëjtën gradë që mbante në çastin e lirimit dhe kjo periudhë i llogaritet vjetërsi për efekt gradimi.

KREU IV
MARRËDHËNIET ME PERSONA DHE ORGANIZMA TË TJERË

Neni 46

Bashkëpunimi me institucionet e tjera

Bashkëpunimi me institucionet e tjera qendrore të administratës publike rregullohet me akte normative të përbashkëta.

Organet vendore të Policisë bashkëpunojnë me njësitë e qeverisjes vendore në fushën e rendit dhe të sigurisë publike, si dhe në zbatimin e ligjit, duke respektuar pavarësinë e tyre dhe karakterin unitar e të centralizuar të Policisë.

Organet e Policisë së qarkut mbajnë marrëdhënie me prefektin, sipas dispozitave ligjore në fuqi.

Neni 47

**Organizatat ndërkombëtare dhe organizmat jashtë shtetit
të barasvlershme me Policinë**

1. Policia mund t'i japë këshilla dhe ndihmesë një organizate ndërkombëtare ose një institucioni shtetëror jashtë Republikës së Shqipërisë, që kryen funksionet e saj në nivel kombëtar ose ndërkombëtar, sikurse përcaktohet në nenin 4 të këtij ligji. Këto kompetenca ushtrohen vetëm me miratimin e një punonjësi të Policisë të gradës “Zëvendësdyrëtor i Përgjithshëm” ose “Dyrtor i Përgjithshëm”.

2. Këshillimi dhe asistenca mund të jepen sipas pikës 1 të këtij neni vetëm kur:

a) e kërkon organizmi apo institucioni;

b) dhënia e këshillës dhe asistencës autorizohet nga një marrëveshje ndërkombëtare, ku Republika e Shqipërisë është palë.

3. Bazuar në pikat 1 dhe 2 të këtij neni, me leje dhe autorizim të Ministrisë së Punëve të Jashtme dhe të Dyrtorit ose Zëvendësdyrtorit të Përgjithshëm të Policisë, Policia mund të dërgojë punonjës policie për një periudhë të përkohshme shërbimi në një organizatë ndërkombëtare apo bazuar në marrëveshje ndërkombëtare, të nënshkruara nga Republika e Shqipërisë për përmbushjen e detyrave policore ose detyrave të tjera joushtarake jashtë shtetit.

4. Marrëveshja përkatëse, e bërë sipas pikës 3 të këtij neni, përcakton se në drejtimin dhe kontrollin e kujt do të jetë punonjësi i Policisë, kur ai është i angazhuar për një periudhë të përkohshme shërbimi, si dhe faktin nëse punonjësi i Policisë gjatë kësaj kohe nuk do të jetë nën drejtimin dhe kontrollin e ndonjë punonjësi të Policisë.

Neni 48

Marrëdhëniet me të tretët

1. Mbi bazën e kërkesës së personave juridikë e fizikë, publikë ose privatë, si dhe në varësi të mundësive që ka, Policia ofron shërbime policore shtesë kundrejt pagesës.

2. Llojet e shërbimeve dhe tarifat e pagesës përcaktohen me vendim të Këshillit të Ministrave.

PJESA E TRETË
MENAXHIMI I POLICISË

KREU I
TË PËRGJITHSHME

Neni 49

E drejta për t'u pranuar në Polici

Ka të drejtë të konkurrojë për t'u pranuar si punonjës policie çdo person që plotëson kriteret e mëposhtme:

- a) është shtetas i Republikës së Shqipërisë;
- b) ka zotësi të plotë për të vepruar;
- c) është në gjendje të mirë shëndetësore dhe i aftë fizikisht për të kryer detyrën;
- ç) ka mbaruar shkollën e mesme;
- d) jep informacionin e kërkuar në lidhje me punën e tij të mëparshme ose ndonjë çështje tjetër që lidhet me pranimin e tij në shërbimin policor;
- dh) nuk është dënuar penalisht me vendim gjyqësor të formës së prerë;
- e) ka dëshmi të aftësisë së drejtimit të automjetit të tipit B.

Neni 50

Shkollimi dhe trajnimi

1. Kandidati, i cili përzgjidhet për t'u pranuar si punonjës i Policisë, duhet:
 - a) të përfundojë shkollimin bazë të Policisë, në përputhje me Rregulloren e Personelit të nxjerrë në zbatim të këtij ligji;
 - b) të vihet në periudhë prove për dy vjet pas përfundimit të trajnimit bazë.
2. Kandidati, i cili është përzgjedhur si punonjës policie në një funksion e nuk kërkon ushtrimin e kompetencave policore, sipas legjislacionit penal dhe pjesës së katërt të këtij ligji, duhet:
 - a) të marrë trajnimin përkatës në institucionin e shkollimit policor;
 - b) të vihet në periudhë prove për një vit.

Neni 51

Shkollimi dhe kualifikimet jashtë shtetit

1. Njohja dhe ekuivalentimi i shkollimeve të kryera jashtë shtetit bëhen në përputhje me ligjin për arsimin e lartë. Njohja dhe ekuivalentimi i trajnimeve të kryera jashtë shtetit bëhen me udhëzim të ministrit.
2. Një person, i cili është emëruar në Polici sipas këtij neni, duhet të kryejë trajnimin mbi legjislacionin shqiptar në Akademinë e Policisë dhe t'i nënshtrohet kriterëve të njëjta për ngritje në gradë, të përcaktuara në nenin 41 pikat 2 dhe 3 të këtij ligji.

Neni 52

Pranimi në Polici

1. Një person pranohet në Polici me urdhër të ministrit në çastin që pranohet në Shkollën Bazë të Policisë.
2. Nëse personi është kualifikuar dhe diplomuar sipas nenit 50 të këtij ligji, ai caktohet në njësinë përkatëse të Policisë me urdhër të Drejtorit të Përgjithshëm të Policisë.
3. Ditën që pranohet në Polici, personi nënshkruan një kontratë, në përmbajtjen e së cilës ekzistojnë sanksione në rastet e refuzimit për të shkuar në vendin ku është caktuar të shërbejë.

Neni 53

Caktimi i detyrave dhe transferimi i punonjësve

1. Personit të emëruar në Polici i caktohen detyra, në përputhje me udhëzimet e nxjerra nga Drejtori i Përgjithshëm i Policisë.
2. Personi i emëruar në Polici, në përputhje me gradën që ka, mund të caktohet me shërbim kudo qoftë, brenda territorit të vendit.
3. Punonjësi i Policisë njoftohet të paktën një muaj përpara për vendimin për transferimin e tij jashtë rrethit ku ai aktualisht banon.
4. Pika 3 e këtij neni nuk zbatohet kur transferimi bëhet për nevoja të ngutshme shërbimi. Në këto raste transferimi nuk duhet të jetë për më shumë se dy muaj.

Neni 54

Transferimet

1. Drejtorët e drejtorive të Policisë së qarqeve, drejtorive rajonale të Kufirit dhe Migracionit dhe drejtorive qendrore mund të transferojnë punonjës me gradën “Inspektor”, “Kryeinspektor” dhe “Nënkomisar” në pozicione, të cilat janë brenda drejtimit të tyre, me kusht që të dyja pozicionet të kërkojnë të njëjtën gradë.
2. Të gjitha transferimet e tjera kryhen nga Drejtori i Përgjithshëm i Policisë.

Neni 55

Caktimi i detyrave në Departamentin e Kufirit dhe Migracionit

1. Përveç rasteve të përcaktuara në pikën 3 shkronja “a” të këtij neni, një punonjësi të Policisë, të emëruar në Departamentin e Kufirit dhe Migracionit, duhet t’i ngarkohen detyra për një periudhë të pandërprerë të paktën 3-vjeçare.
2. Përpara se një punonjës i Policisë të emërohet në Departamentin e Kufirit dhe Migracionit, ai duhet të ketë përfunduar trajnimin e parashikuar për kufirin dhe migracionin.
3. Kur Drejtori i Përgjithshëm i Policisë e vlerëson të nevojshme për mbrojtjen e rendit dhe të sigurisë publike dhe të të drejtave të individëve, ai mund të vendosë që:
 - a) një punonjës i Policisë të caktohet përkohësisht me detyra në Departamentin e Kufirit dhe Migracionit;
 - b) një punonjësi të Policisë, të emëruar në Departamentin e Kufirit dhe Migracionit, t’i caktohen detyra, të cilat nuk janë të njëjta me ato të Departamentit të Kufirit dhe Migracionit për një periudhë jo më shumë se një muaj.

Neni 56

Vlerësimi i punonjësve të Policisë

Punonjësi i Policisë vlerësohet çdo vit dhe sa herë kërkohet ose është e nevojshme, në përputhje me Rregulloren e Personelit.

Neni 57

Lirimi dhe përjashtimi nga Policia

1. Një punonjës i Policisë lirohet ose përjashtohet nga Policia, në përputhje me kushtet e këtij neni dhe kur është dhënë autorizimi i nevojshëm, sikurse përcaktohet në pikën 4 të këtij neni.
2. Një punonjës i Policisë lirohet nga Policia nëse:
 - a) deklarohet i paaftë nga ana shëndetësore me vendim të komisionit mjeko-ligjor;
 - b) i shkurtohet funksioni organik dhe nuk kërkon uljen në gradë;
 - c) punësohet në struktura të tjera të administratës publike, në funksione që kanë për objekt çështje të rendit e të sigurisë publike;

- ç) mbush moshën për pension të plotë pleqërie;
- d) nuk kalon kursin e Shkollës Bazë të Policisë, sipas nenit 41 pika 3 të këtij ligji;
- dh) kërkon vetë të lirohet.

3. Një punonjës i Policisë largohet nga Policia nëse dënohet me burgim me vendim gjyqësor të formës së prerë, si dhe kur ndaj tij merret masa disiplinore e përjashtimit nga Policia.

4. Lirimi dhe përjashtimi i punonjësit të Policisë bëhen me urdhër të titullarit kompetent për emërimin e tij, sipas nenit 42 të këtij ligji.

Neni 58

Ripranimi në Polici

1. Një person i liruar sipas nenit 57 pika 2 shkronjat “a”, “b”, “c”, “d” e “dh” të këtij ligji, mund të ripranohet në Polici kur ka vende vakante në pozicionin për të cilin ai ka kualifikimin e duhur. Nëse ripranimi bëhet brenda 12 muajve të pandërprerë, atëherë ai rifiton gradën e tij të mëparshme.

2. Nëse ripranimi bëhet pasi kanë kaluar 12 muaj të pandërprerë, punonjësi i Policisë vazhdon karrierën një gradë më poshtë nga ajo që mbante para lirimit ose ricertifikohet për gradën që mbante më parë.

Neni 59

Dhënia e pajisjeve

1. Punonjësi i Policisë ka të drejtë të mbajë armë. Llojet e armatimit, të lëndëve kimike (neuroparalizuese) dhe të mjeteve të tjera të përdorimit të forcës nga Policia përcaktohen me vendim të Këshillit të Ministrave.

2. Punonjësit të Policisë i jepen në përdorim mjete dhe pajisje të tjera nga ato të parashikuara në pikën 1 të këtij neni, sipas akteve normative të ministrit.

3. Pajisjet, ku përfshihen automjetet, që u jepen punonjësve të Policisë për kryerjen e detyrave të tyre, duhet të përdoren vetëm për qëllime pune.

KREU II

DETYRIMET KRYESORE TË PUNONJËSVE TË POLICISË

Neni 60

Detyrimi për të zbatuar urdhra të bazuar në ligj

1. Një punonjës i Policisë duhet të zbatojë të gjithë urdhrat që i jepen nga një person më i lartë në funksion ose në gradë.

2. Kur një punonjës i Policisë ka shkaqe të mjaftueshme të dyshojë se urdhri i dhënë nga eprori i tij është i paligjshëm, ai duhet, pa vonesë, t’ia bëjë të ditur eprorit dhe të kërkojë që urdhri të jepet me shkrim.

3. Punonjësi epror i Policisë ka detyrimin të japë urdhrin me shkrim, në rast se kërkohet sipas pikës 2 të këtij neni.

4. Në rastet kur moszbatimi i urdhrin deri në dhënien me shkrim të tij, sipas pikës 3 të këtij neni, rrezikon jetën e një personi tjetër, punonjësi i Policisë duhet të zbatojë urdhrin.

5. Kur një punonjës policie, edhe pas zbatimit të procedurave, sipas pikës 2 ose 3 të këtij neni, vazhdon të ketë arsye për të dyshuar se urdhri është i paligjshëm, ai kryen veprimet e mëposhtme:

a) kundërshton urdhrin, me përjashtim të rastit të parashikuar në pikën 4 të këtij neni;

b) vë menjëherë në dijeni titullarin, i cili është drejtpërdrejt mbi eprorin që e ka dhënë urdhrin, si dhe për masat e marra prej tij, sipas këtij neni.

Neni 61

Detyrimi për të kryer detyrat pa diskriminim

Punonjësi i Policisë duhet t'i trajtojë personat në mënyrë të barabartë dhe duhet t'i kryejë detyrat pa diskriminim në bazë të gjinisë, racës, ngjyrës, gjuhës, besimit, etnisë, bindjeve politike, fetare ose filozofike, orientimit seksual, gjendjes ekonomike, arsimore, sociale ose përkatësisë prindërore, në përputhje me nenin 18 të Kushtetutës.

Neni 62

Detyrimi për të respektuar dinjitetin dhe integritetin fizik

Punonjësi i Policisë, në çdo rast, duhet të respektojë dinjitetin dhe integritetin fizik të çdo punonjësi tjetër të Policisë, përfshirë edhe vartësit e tij.

Neni 63

Detyrimi për të parandaluar arratisjen nga një ndalim i ligjshëm

Punonjësi i Policisë ka për detyrë që, në përputhje me këtë ligj dhe legjislacionin në fuqi, të marrë të gjitha masat e nevojshme për të parandaluar arratisjen e një personi në rastet e shoqërimit, të ndalimit apo të arrestimit nga Policia.

Neni 64

Detyrimi për garantimin e ndihmës mjekësore

1. Kur një punonjësi të Policisë i besohet ruajtja e një personi, për të cilin ai vlerëson se ka nevojë për kujdes mjekësor, punonjësi i Policisë duhet të kërkojë ndihmë mjekësore dhe të marrë masat e nevojshme, realisht të zbatueshme, për të mbrojtur jetën dhe shëndetin e personit.

2. Nëse një punonjës policie dëmton një person gjatë kryerjes së një veprimi kur është në detyrë, ai duhet të kërkojë ndihmë mjekësore dhe të marrë masat e nevojshme dhe realisht të zbatueshme për të mbrojtur jetën dhe shëndetin e personit.

Neni 65

Detyrimi për të dhënë ndihmë gjatë ushtrimit të detyrës

1. Punonjësi i Policisë duhet t'i vijë në ndihmë një punonjësi tjetër të Policisë gjatë ushtrimit të detyrës, kur vlerëson se ai ka nevojë për ndihmë, me përjashtim të rasteve kur kjo ndihmë refuzohet.

2. Në rastet kur punonjësi i Policisë që ofron ndihmën e tij është në shërbim, ai është i detyruar të vlerësojë dhe të zbatojë përparësinë në kryerjen e detyrës.

Neni 66

Detyrimi për të ruajtur pronën

Punonjësi i Policisë është përgjegjës për ruajtjen dhe administrimin nga çdo dëmtim të armatimit, pajisjeve dhe mjediseve që i janë dhënë në përdorim për ushtrimin e detyrës dhe plotësimin e kushteve të punës dhe të jetesës.

Neni 67

Detyrimi për të mos dhënë informacione të klasifikuara

1. Punonjësi i Policisë nuk duhet të japë informacione të klasifikuara, për të cilat ka marrë dijeni gjatë kryerjes së detyrës ose edhe jashtë saj në mënyrë të rastësishme.

2. Pika 1 e këtij neni përbën detyrim për zbatim edhe për punonjësit e Policisë të liruar ose të përjashtuar nga Policia.

Neni 68

Kufizimet në jetën politike të punonjësve të Policisë

1. Punonjësi i Policisë nuk mund të jetë anëtar i një partie ose organizate politike.
2. Punonjësi i Policisë nuk mund të mbështesë fushatën e një partie ose organizate politike ose të një anëtarit të një partie politike apo të një kandidati të pavarur, duke marrë pjesë ose kontribuar fizikisht ose financiarisht.
3. Punonjësi i Policisë ka për detyrë të ushtrojë funksionet e veta në mënyrë të paanshme dhe pavarësisht bindjeve të tij politike.

Neni 69

Detyrimi për të respektuar uniformën

Punonjësi i Policisë përdor uniformën, shenjat dhe simbolet e Policisë vetëm gjatë kryerjes së detyrës.

Neni 70

Detyrimi për të raportuar ankesat

Punonjësi i Policisë i raporton eprorit përkatës ose, në mungesë të tij, eprorit të eprorit, çdo ankesë të marrë në lidhje me sjelljen e një punonjësi tjetër të Policisë.

Neni 71

Detyrimi për të raportuar shkeljen

Punonjësi i Policisë i raporton eprorit përkatës ose, në mungesë të tij, eprorit të eprorit, çdo shkelje, për të cilën ai ka dyshime të mjaftueshme të besojë se është kryer nga një person, pavarësisht nëse ai ka marrë dijeni për këtë shkelje gjatë kryerjes së detyrës ose në rrethana të tjera.

Neni 72

Detyrimi për të raportuar shkeljet e disiplinës

Punonjësi i Policisë i raporton eprorit përkatës ose, në mungesë të tij, eprorit të eprorit, çdo shkelje, për të cilën ai ka dyshime të mjaftueshme të besojë se është kryer nga një punonjës tjetër i Policisë, pavarësisht nëse ai ka marrë dijeni për këtë shkelje gjatë kryerjes së detyrës ose në rrethana të tjera.

Neni 73

Kufizimi për veprimtari të dyta

1. Punonjësi i Policisë nuk mund të punësohet ose të kryejë veprimtari private, të cilat pengojnë plotësimin e kërkesave të detyrës.
2. Në rastet e dypunësimit, punonjësi i Policisë ka detyrimin të njoftojë paraprakisht strukturën përkatëse në Drejtorinë e Përgjithshme të Policisë.
3. Punonjësi i Policisë ka detyrimin të njoftojë paraprakisht strukturën përkatëse në Drejtorinë e Përgjithshme të Policisë nëse bashkëshorti/ja, prindërit, motrat e vëllezërit apo fëmijët e tij ndërmarrin një veprimtari apo drejtojnë një biznes që mund të çojë në konflikt interesash me kompetencat dhe detyrën e tij si punonjës policie.

KREU III
PROCEDURAT E BRENDSHME DISIPLINORE

Neni 74
Shkelja disiplinore

Kur nuk përbën vepër penale, vlerësohet shkelje disiplinore çdo veprim ose mosveprim i punonjësit të Policisë, që bie në kundërshtim me Rregulloren e Disiplinës, të miratuar me vendim të Këshillit të Ministrave.

Neni 75
Masat disiplinore

1. Masat që mund të merren ndaj punonjësit të Policisë në rastet e shkeljeve disiplinore janë:
 - vërejtje;
 - vërejtje me paralajmërim;
 - gjobë në masën sa paga e punonjësit për pesë ditë pune;
 - ç) shtyrje e afatit të gradimit nga një muaj deri në një vit;
 - pezullim pa pagesë nga pesë ditë deri në tridhjetë ditë;
 - dh) ulje jo më shumë se një gradë deri në 12 muaj;
 - e) përjashtim nga Policia.
2. Masa disiplinore e dhënë duhet të jetë në përshtatje me shkeljen e kryer dhe me pasojat e ardhura prej saj.
3. Efektet e masës disiplinore fillojnë pasi të ketë përfunduar procesi disiplinor, ku përfshihen procedurat përkatëse të apelimit dhe pasi të jetë dhënë vendimi përfundimtar.

Neni 76
Procesi disiplinor

1. Vendimi për masën disiplinore duhet t'i komunikohet me shkrim, brenda 3 ditëve pune, vetë punonjësit të Policisë. Punonjësi i Policisë vihet gjithashtu në dijeni për të drejtën e tij për të apeluar vendimin.
2. Punonjësi i Policisë, i ndëshkuar me një masë disiplinore, ka të drejtë të marrë pjesë në procesin disiplinor dhe të ndihmohet nga një punonjës policie i zgjedhur prej tij me të njëjtën gradë ose me gradë më të lartë.

Neni 77
E drejta për ankim

1. Punonjësi i Policisë, ndaj të cilit merret një masë disiplinore, sipas nenit 75 pika 1 shkronjat "a" dhe "b" këtij ligji, ka të drejtë të ankohet tek eprori i punonjësit të Policisë që ka dhënë masën ndaj tij brenda 5 ditëve nga çasti i marrjes dijeni për dhënien e masës disiplinore.
2. Punonjësi i Policisë, ndaj të cilit merret një masë disiplinore, sipas nenit 75 pika 1 shkronjat "c", "ç", "d", "dh" dhe "e" të këtij ligji, ka të drejtë të ankohet me shkrim në komisionin e apelimit të punonjësve të Policisë brenda 10 ditëve nga çasti i marrjes dijeni me shkrim për dhënien e masës disiplinore. Brenda 30 ditëve nga marrja dijeni e vendimit të komisionit të apelimit, punonjësi i Policisë ka të drejtë të ankimojë vendimin në gjykatë.
3. Masa disiplinore nuk mund të jepet nga eprori, nëse ajo nuk i komunikohet punonjësit të Policisë brenda 30 ditëve nga vënia re e shkeljes dhe verifikimi i saj.
4. Procedurat disiplinore bëhen publike, me përjashtim të rasteve kur problemet që do të shqyrtohen klasifikohen sekrete.

5. Punonjësi i Policisë, ndaj të cilit merret një masë disiplinore, sipas nenit 75 të këtij ligji, ka të drejtë që, brenda 30 ditëve nga marrja dijani për masën disiplinore të marrë ndaj tij, të ankohet edhe drejtpërdrejt në gjykatë.

Neni 78

E drejta për ankim në rastet e lirimit nga detyra

Çdo punonjës policie, i cili njoftohet se i është dhënë autorizimi për t'u liruar nga detyra, sipas nenit 57 pika 2 shkronja "b" të këtij ligji, ka të drejtë ta apelojë atë në komisionin e apelimit të punonjësve të Policisë ose drejtpërdrejt në gjykatë, si dhe ka të drejtë që, brenda 30 ditëve nga marrja dijani për lirimin e tij nga detyra, të ankohet edhe drejtpërdrejt në gjykatë.

Neni 79

Afatet e evidentimit të masës disiplinore

1. Masat disiplinore "Vërejtje", "Vërejtje me paralajmërim" dhe "Gjobë në masën sa paga e punonjësit për pesë ditë pune" qëndrojnë në dosjen personale të punonjësit të Policisë për një periudhë prej 6 muajsh, periudhë pas së cilës shuhet.

2. Masat disiplinore "Shtyrja e afatit të gradimit nga një muaj deri në një vit", "Pezullimi pa pagesë nga pesë ditë deri në tridhjetë ditë" dhe "Ulje deri në një gradë" qëndrojnë në dosjen personale të punonjësit të Policisë për një periudhë prej një viti nga data e përfundimit të ekzekutimit të masës, periudhë pas së cilës shuhet.

3. Pas kalimit të periudhave të përcaktuara në pikat 1 dhe 2 të këtij neni, i gjithë dokumentacioni që lidhet me masat disiplinore të përcaktuara në nenin 75 shkronjat "dh" dhe "e" të këtij ligji vendoset në Qendrën e të Dhënave të Personelit dhe ruhet gjatë gjithë kohës së punës së këtij punonjësi. Këto të dhëna nuk mund t'i bëhen të ditura asnjë institucioni apo strukture pa lejen me shkrim të Drejtorit të Përgjithshëm të Policisë.

4. Masa disiplinore "Përrjashtim nga Policia" qëndron përgjithmonë në dosjen personale të ish-punonjësit të Policisë.

Neni 80

Rregullorja e Disiplinës

Kategoritë dhe llojet e shkeljeve disiplinore, kriteret, rregullat, procedurat dhe dokumentacioni për dhënien e masave disiplinore, si dhe përbërja, mënyra e organizimit dhe e funksionimit të komisionit të apelimit të punonjësve të Policisë përcaktohen në Rregulloren e Disiplinës.

Neni 81

Hetimi pavarur i sjelljes së punonjësve të Policisë

Procedurat për përcaktimin e veprimeve që duhet të merren kur një qytetar beson se veprimet apo mosveprimet e punonjësit të Policisë kanë dhunuar të drejtat dhe liritë e tij parashikohen në Rregulloren e Disiplinës.

KREU IV

ÇËSHTJET QË LIDHEN ME PUNËSIMIN

Neni 82

Sindikata e Policisë së Shtetit

Sindikata e Policisë është një e vetme dhe ka për qëllim përfaqësimin e punonjësve të Policisë, anëtarë të saj, në të gjitha çështjet që ndikojnë në mbarëvajtjen e punës së tyre dhe

efikasitetin në punë.

Sindikata e Policisë mund të përfaqësojë punonjësit e Policisë, anëtarë të sindikatës, në mbrojtje të tij në të gjitha rastet e apelimit për çdo çështje të ngritur, në mbështetje të akteve nënligjore të nxjerra në zbatim të këtij ligji.

Të gjithë punonjësit e Policisë, me përjashtim të Drejtorit të Përgjithshëm dhe zëvendës drejtorëve të përgjithshëm të Policisë, mund të jenë anëtarë të sindikatës.

Punonjësit e Policisë së Shtetit, që nuk dëshirojnë të jenë anëtarë të Sindikatës së Policisë së Shtetit, duhet të dorëzojnë një kërkesë me shkrim në organin drejtues të sindikatës.

Sindikata e Policisë krijohet dhe funksionon në përputhje me legjislacionin në fuqi.

Neni 83

Ndalimi i së drejtës së grevës

Punonjësve të Policisë u ndalohet e drejta e grevës.

Neni 84

Ndalimi i përdorimit të mjeteve të Policisë në veprimtaritë sindikaliste

Punonjësve të Policisë u ndalohet të mbajnë uniformën e Policisë, të mbajnë armë apo të përdorin ndonjë mjet policie gjatë veprimtarive sindikaliste.

Neni 85

Detyrimet e Policisë ndaj Sindikatës së Policisë

1. Ministri e lejon kryesinë e përcaktuar në statutin e sindikatës të mblidhet katër herë në vit gjatë orarit të punës.

2. Ministri e lejon asamblenë e përcaktuar në statutin e sindikatës të mblidhet një herë në vit gjatë orarit të punës.

3. Marrëdhëniet mes sindikatës dhe Drejtorisë së Përgjithshme të Policisë rregullohen me marrëveshje dypalëshe.

KREU V

TRAJTIMI I PERSONELIT

Neni 86

Rregullat dhe procedurat për marrëdhëniet e punës, trajnimit, ecurisë në karrierë dhe ndërprerjes së saj, përcaktohen në Rregulloren e Personelit në zbatim të këtij ligji, të miratuar nga Këshilli i Ministrave.

Neni 87

Koha e punës dhe e pushimit

1. Koha e punës dhe e pushimit për punonjësit e Policisë njësohet me atë të punonjësve të tjerë të administratës publike, përveçse kur parashikohet ndryshe në këtë ligj.

2. Pushimi vjetor i pagueshëm për punonjësit e Policisë është 30 deri në 45 ditë kalendarike dhe jepet i shkallëzuar, sipas niveleve dhe gradave.

3. Kur për arsye pune e shërbimi, pushimi vjetor nuk mund të jepet brenda vitit, ai duhet të jepet jo më vonë se në muajin mars të vitit pasardhës, në të kundërt bëhet kompensimi në vlerë, sikurse edhe për orët shtesë të punës dhe të shërbimit.

4. Në rastet e gjendjes së jashtëzakonshme, të fatkeqësive natyrore apo të gatishmërisë, koha deri në 24 orë mbi kohën normale të punës e të shërbimit, brenda 6 muajve, nuk trajtohet si orë

shtesë pune.

5. Në rast fatkeqësie familjare, martese apo në raste të tjera të veçanta, punonjësit të Policisë i jepet deri në 7 ditë leje e pagueshme ose deri në 2 muaj leje pa të drejtë pagese.

Periudha e lejes pa të drejtë pagese nuk llogaritet në vjetërsi pune e shërbimi dhe as për efekte të ecurisë në karrierë.

6. Kriteret dhe masat e përfitimeve përcaktohen me akt të veçantë normativ të Këshillit të Ministrave.

Neni 88

Rregullimi i pagave

1. Për shkak të përgjegjësisë dhe të rrezikshmërisë së lartë në detyrë, punonjësi i Policisë ka përparësi në trajtimin me pagë.

2. Paga e punonjësit të Policisë caktohet sipas gradës dhe funksionit që ka fituar.

3. Paga mujore e punonjësit të Policisë përbëhet nga paga bazë, që është paga për gradë dhe nga shtesat mbi pagën bazë (në përqindje ose në shumë absolute) për kushte të tjera të veçanta të vendit të punës e të shërbimit, përfshirë profesionin, kualifikimin dhe kohën e qëndrimit në gradë për kompensim të privacioneve dhe humbjeve që i krijohen punonjësit të Policisë, për shkak të nevojave të punës e të shërbimit.

4. Punonjësi i Policisë përfiton edhe të gjitha shtesat e tjera të veçanta mbi pagë, si dhe shpërblimet që përfitojnë punonjësit e tjerë të administratës publike.

5. Punonjësit e Policisë përfitojnë çdo vit, në fund të vitit financiar, një shpërblim deri në një pagë mujore, të njëjtë me atë të përfituar nga punonjësit civilë dhe punonjësit e tjerë të administratës shtetërore. Ky shpërblim jepet në bazë të një shkalle përpjesëtueshmërie, që pasqyron kohën e punës së kryer nga punonjësi gjatë vitit financiar. Punonjësit që nuk kanë mungesa në punë për çfarëdo arsye, përveç kohës së pushimit, kanë të drejtën e shpërblimit të plotë. Kjo pagë nuk përfitohet në rastet kur punonjësi është ndëshkuar me masën “Përfshirë nga Policia”.

6. Rregullimi i pagave, kriteret dhe përgjegjësitë për dhënien e tyre miratohen me vendim të Këshillit të Ministrave.

Neni 89

Dhënia e pensionit dhe përfitimeve suplementare

Punonjësi i Policisë, përveç përfitimeve që rrjedhin nga ligji nr. 7703, datë 11.5.1993 “Për sigurimet shoqërore në Republikën e Shqipërisë”, i ndryshuar, gëzon të drejtën e përfitimeve të tjera shtesë, sipas kushteve dhe kriterëve të përcaktuara në ligjin nr.8661, datë 18.9.2000 “Për sigurimin shoqëror suplementar të punonjësve të Policisë së Shtetit”.

Neni 90

Përparësia për rikthim në shërbim

Punonjësi i Policisë që gjendet në pagesë kalimtare dhe që plotëson kushtet e kriteret për të vazhduar karrierën policore, nëse ajo është ndërprerë, në çdo rast ka përparësi për t’u rikthyer në shërbim brenda një viti nga çasti që fiton pagesën kalimtare, në raport me kandidaturat e tjera që mund të paraqiten për një funksion të caktuar, sipas gradës që mban apo që i takon.

Neni 91

Baza e të dhënave të shenjave të gishtave dhe ADN-së së punonjësve të Policisë

1. Shenjat e gishtave dhe mostra e ADN-së e të gjithë punonjësve të Policisë do të ruhen në një bazë të dhënash në Laboratorin e Policisë Shkencore, për të përjashtuar të dhënat e tyre nga ato të proceseve. Ruajtja e të dhënave do t’i shërbejë procesit të rekrutimit për ata që do të aplikojnë për

t'u pranuar në Policinë e Shtetit dhe këto të dhëna do të merren nga të gjithë punonjësit në shërbim, nëse ato nuk janë marrë në çastin e marrjes në punë.

2. Shenjat e gishtave dhe mostra e ADN-së së marrë, për të krijuar këtë bazë të dhënash, do të shkatërrohen, qoftë në letër apo formë elektronike, sapo një punonjës policie del në pension, lirohet apo përjashtohet nga Policia.

3. Nëse një punonjës policie rikthehet, shenjat e gishtave dhe mostra e ADN-së do të rimerren.

PJESA E KATËRT KOMPETENCAT E POLICISË

KREU I MASAT PËR RUAJTJEN E RENDIT DHE TË SIGURISË PUBLIKE

DISPOZITA TË PËRGJITHSHME

Neni 92 **Detyrat**

Në zbatim të përgjegjësive të përcaktuara në nenin 4 të këtij ligji, punonjësit e Policisë kryejnë veprimet e mëposhtme:

- a) duhet të shmangin në të gjitha rastet rrezikun për shtetasit dhe veten;
- b) në rastet kur punonjësit e Policisë vlerësojnë se ka nevojë për marrjen e masave shtesë ose nevojitet ndihmë, duhet menjëherë të njoftojnë autoritetet përgjegjëse administrative dhe t'i këshillojnë ato për masat e mundshme.

Neni 93 **Proporcionaliteti**

1. Masa për të shmangur rrezikun duhet të jetë në proporcion me shkallën e rrezikshmërisë dhe ajo nuk duhet të përbëjë kapërcim të kufijve të nevojës për situatën e paraqitur.

2. Masa mbetet e përshtatshme edhe nëse ajo ul masën e rrezikut ose e pakëson atë përkohësisht. Nëse masa është e paefektshme, atëherë mund të zgjidhet një masë tjetër me ndikim më të madh.

Neni 94 **Ndërprerja e masave**

Zbatimi i mëtejshëm i çdo mase të ndërmarrë ndërpritet menjëherë kur shkaku i saj nuk ekziston më.

Neni 95 **Ekzekutimi i menjëhershëm**

1. Ekzekutimi i menjëhershëm i masës mund të merret vetëm nëse duhet mënjanuar një rrezik real dhe i çastit për sigurinë dhe rendin publik, i cili nuk mund të shmanget me anë të mjeteve të tjera.

2. Personi, ndaj të cilit ndërmerret masa, duhet të njoftohet menjëherë për masën e marrë.

3. Autoritetet mund të kërkojnë, me një akt administrativ, që kostoja për ekzekutimin e menjëhershëm të rifinancohet nga ata persona që janë përgjegjës, sipas neneve 97 dhe 98 të këtij ligji.

Neni 96
Masat për ruajtjen e rendit

1. Kur sjellja e një personi cenon rendin dhe sigurinë publike, ndaj tij merret masë.
2. Nëse cenimi i rendit dhe sigurisë publike ka ardhur si pasojë e veprimeve të një personi të mitur nën 14 vjeç, përveç masave të marra ndaj tij, sipas nenit 11 të këtij ligji, punonjësi i Policisë njofton prindin ose kujdestarin e të miturit nën 14 vjeç për ndërprerjen e veprimeve të paligjshme të të miturit.

Neni 97
Përgjegjësia për gjendjen e objekteve

Kur siguria dhe rendi publik rrezikohen ose cenohen nga gjendja e një objekti, punonjësi i Policisë merr masa ndaj pronarit të objektit ose, në rast pamundësie, njofton organin kompetent. Masa mund të jepet edhe ndaj personit që sillet si pronar i objektit.

Neni 98
Masat ndaj palëve të treta

1. Masat mund të merren ndaj personave që nuk përfshihen në nenet 96 dhe 97 të këtij ligji, në qoftë se rreziku real dhe i çastit për sigurinë dhe rendin publik ose cenimi i sigurisë dhe i rendit publik nuk mund të shmangen ndryshe dhe për sa kohë që punonjësi përkatës i Policisë nuk ka personelin dhe mjetet e duhura.
2. Sipas kushteve paraprake të pikës 1 të këtij neni, punonjësit e Policisë mund të kërkojnë ndihmë; ata gjithashtu mund të marrin përkohësisht në posedim objekte të tilla si mjedise akomodimi, medikamente dhe ushqim, mjete pune, materiale ndërtimi dhe mjete transporti.
3. Në çdo rast të bashkëpunimit vullnetar apo të përdorimit me forcë të pronës së palëve të treta, lëshohet procesverbal i përkatës.
4. Në çdo rast të thirrjes ose bashkëpunimit vullnetar të një personi apo pale të tretë për ndihmë, për përdorim të mjediseve, mjeteve, objekteve, sendeve apo konsumit të mallrave dhe materialeve të tyre, bëhet kompensimi fizik ose monetar.
5. Lloji dhe masa e kompensimit përcaktohen duke mbajtur parasysh përgjegjësinë e palëve dhe përfitimin nga shërbimi i ofruar, në përputhje me Kodin Civil dhe miratohen nga Drejtori i Përgjithshëm i Policisë.
6. Kur i interesuari nuk bie dakord me llojin dhe masën e kompensimit, ka të drejtën e ankimit në gjykatë.
7. Pretendimi për kompensim, sipas këtij neni, duhet të paraqitet jo më vonë se 30 ditë nga data e lindjes së kësaj të drejte dhe të realizohet jo më vonë se 30 ditë pas paraqitjes së kërkesës. Me mbarimin e këtij afati, i interesuari ka të drejtë që në rrugë gjyqësore të kërkojë edhe kompensimin për kamatëvonesat ose fitimin e munguar.

Neni 99
Masa e shpërblimit të individit për ndihmën e dhënë

1. Çdo individ mund të ndihmojë Policinë për kryerjen e detyrave të përcaktuara në ligj.
2. Nëse gjatë ndihmës që i jep Policisë, individit plagoset, sëmuret, apo humbet aftësitë e tij për punë, ai ka të drejtë të përfitojë çdo ndihmë mjekësore, pension, pagesë për aftësi në punë dhe pagesë në rast vdekjeje, përfitime të cilat i takojnë një punonjësi policie në rast aksidenti në punë. Paga mbi të cilën llogariten përfitimet e mësipërme është ajo që përfitonte individit në vendin e tij të punës ose paga për të cilën është siguruar në mënyrë vullnetare apo si bujk privat, deri në 30 ditë para ndodhjes së ngjarjes, por ajo nuk mund të jetë më e vogël se paga bazë për gradën “Nënkomisar”. Për rastet kur individit nuk është në marrëdhënie pune ose i siguruar, paga mbi të cilën llogariten këto përfitime është paga bazë për gradën “Kryeinspektor”.

KREU II
MASAT SPECIALE

Neni 100

Njoftimi për paraqitje në Polici

1. Punonjësi i Policisë njofton individë për t'u paraqitur në zyrat e Policisë në këto raste:
për të marrë informacion për parandalimin e një rreziku;
për të identifikuar persona që mund të kenë dijeni për rrezikun apo incidentin;
për të identifikuar shkelësit e mundshëm të ligjit.
2. Njoftimi për paraqitje bëhet me anë të fletënjoftimit ose edhe verbalisht, duke përcaktuar arsyen e paraqitjes, punonjësin e Policisë, kohën, vendin dhe informacion për të kontaktuar punonjësin e Policisë në rast pamundësie për t'u paraqitur.
3. Kur për shkak të kushteve personale dhe familjare, personi që njoftohet nuk mund të paraqitet në zyrat e Policisë, punonjësi i Policisë mund të shkojë ta marrë këtë informacion në vendbanimin e personit të njoftuar.

Neni 101

Shoqërimi në Polici

1. Punonjësi i Policisë bën shoqërimin e personave në mjediset e Policisë ose në organin urdhërdhënës në rastet e mëposhtme:
 - a) për mbikëqyrjen e të miturit për qëllime edukimi ose për shoqërimin e tij në organin kompetent;
 - b) kur personi është përhapës i një sëmundjeje ngjitëse, i paaftë mendërisht dhe i rrezikshëm për shoqërinë.
2. Personat e shoqëruar kanë të drejtën e trajtimit njerëzor dhe të respektimit të dinjitetit të tyre. Ata njoftohen menjëherë nga punonjësi i Policisë për shkaqet e shoqërimit.
3. Personat e shoqëruar mbahen në mjedise të ndryshme nga ato të personave të ndaluar ose të arrestuar. Në këto raste mbajtja e personave në Polici zgjat derisa çështja, për të cilën është kryer shoqërimi, verifikohet, por në çdo rast jo më shumë se 10 orë.
4. Për rastet e shoqërimeve për hyrje të paligjshme në kufirin shtetëror, për dëbimet ose ekstradimet, procedurat dhe afatet e mbajtjes përcaktohen sipas legjislacionit në fuqi.
5. Për shoqërimin dhe mbajtjen e personave në zyrat e Policisë, punonjësi i Policisë bën dokumentimin e veprimit dhe njofton menjëherë eprorin e vet ose organin e interesuar për sqarimin e çështjes.
6. Në të gjitha rastet e shoqërimit dhe mbajtjes në zyrat e Policisë, merren parasysh kushtet personale dhe familjare të personit që shoqërohet.

Neni 102

Kontrolli i identitetit

1. Punonjësi i Policisë bën kontrollin e identitetit të personave kur:
 - a) janë të pranishëm ose në afërsi të drejtpërdrejtë me vendngjarjen dhe kur janë dëshmitarë të mundshëm të veprës penale;
 - b) ekzekutohet një urdhër i organeve përkatëse;
 - c) kërkohen personat e dyshuar për cenim të rendit publik;
 - ç) ata hyjnë ose dalin nga territori i Republikës së Shqipërisë;
 - d) për rrethana të kohës dhe vendit, dyshohet se personi është përfshirë në veprime të jashtëligjshme.
2. Për një identifikim të besueshëm të personit, punonjësi i Policisë bazohet në dokumentet ligjore të identifikimit.

Të dhënat në rastet e shoqërimit, ndalimit dhe arrestimit

Për të regjistruar nga ana administrative të dhënat e personave të arrestuar, të ndaluar ose të shoqëruar, Policia kryen këto veprime:

1. Në rast shoqërimi Policia evidenton për çdo person të shoqëruar të dhënat për:

- gjeneralitetet;
- vendbanimin;
- përshkrimin e pamjes së personit, përfshirë shenja të veçanta;
- ç) punën që kryen;
- arsyet e shoqërimit;
- dh) orën, datën dhe vendin e shoqërimit;
- zyrën e Policisë ku është kryer shoqërimi;
- ë) punonjësën e Policisë, i cili ka kryer shoqërimin.

Këto të dhëna ruhen për shtatë vjet.

2. Në rast arrestimi apo ndalimi, Policia evidenton për çdo person të arrestuar apo të ndaluar të dhënat për:

- a) gjeneralitetet;
- b) vendbanimin;
- c) përshkrimin e pamjes së personit, përfshirë shenja të veçanta;
- ç) punën që kryen;
- d) veprën penale për të cilën është arrestuar apo të ndaluar;
- dh) hollësi për mënyrën e kryerjes së veprës penale, për të cilën është arrestuar apo ndaluar;
- e) orën, datën dhe vendin e arrestimit apo të ndalimit;
- ë) zyrën e Policisë ku është mbajtur;
- f) punonjësën e Policisë, i cili ka kryer arrestimin apo ndalimin.

3. Nga çdo person i arrestuar apo i ndaluar, në çdo rast, Policia merr të dhënat e mëposhtme:

- shenjat e gjurmëve të gishtave dhe të pëllëmbëve të duarve;
- dy fotografi, një pamje ballore dhe një profil;
- mostrën për analizën e ADN-së, kur ekzistojnë kushtet teknike për konservimin dhe administrimin e kampioneve.

4. Punonjësi i Policisë me gradë “Nënkomisar” apo më lart ose në rast emergjence dhe në mungesë të një punonjësi të tillë të Policisë, punonjësi me gradën më të lartë mund të autorizojë përdorimin e forcës së arsyeshme për të realizuar kërkesat e pikës 3 të këtij neni, nëse personi i arrestuar apo i ndaluar kundërshton kërkesën.

5. Policia mund të marrë nga çdo person i shoqëruar të dhënat identifikuese, të përcaktuara në pikën 3 të këtij neni, nëse këto të dhëna nevojiten për të përcaktuar identitetin e personit. Nëse personi i shoqëruar nuk arrestohet apo ndalohet, të dhënat identifikuese të marra duhet të eliminohen pasi të përcaktohet identiteti i tij.

6. Punonjësit e Policisë, të caktuar me detyrë në pikat e kalimit kufitar, mund të marrin shenjat e gjurmëve të gishtave për qëllime identifikimi nga çdo person që kalon kufirin, kur kryen ose dyshohet se ka kryer një vepër penale apo për qëllime administrative.

7. Për të gjithë personat e arrestuar apo të ndaluar, Policia e Shtetit krijon një bankë qendrore me të gjitha të dhënat e mbledhura, sipas pikës 2 të këtij neni dhe me të gjitha shenjat e gishtave, fotografitë dhe ADN-në, të marra sipas pikës 3 të këtij neni.

8. Drejtori i Përgjithshëm i Policisë ka detyrimin të eliminojë të dhënat e identitetit, të përcaktuara në pikën 3 të këtij neni, të cilat i merren personit të arrestuar apo të ndaluar, mbi bazën e kërkesës së tij, nëse çështja penale në ngarkim të tij pushohet apo ai shpallet i pafajshëm me vendim gjyqësor të formës së prerë.

Neni 104

Largimi nga vendndodhja

Për të shmangur kërcënimin ose shqetësimin për rendin ose sigurinë publike, punonjësi i Policisë mund të urdhërojë personin të largohet nga vendndodhja ose mund ta ndalojë atë të hyjë në një mjedis, për aq kohë sa ky kërcënim apo shqetësim vazhdon.

Neni 105

Blokimi i rrugëve

Për nevoja të rendit dhe sigurisë publike dhe zbatimit të ligjit, ose në rastet e fatkeqësive natyrore apo të aksidenteve, punonjësit e Policisë bllokojnë pjesë të rrugëve ose të mjediseve publike, deri në kryerjen e veprimeve të nevojshme ligjore.

Neni 106

Masat mbrojtëse

1. Masat mbrojtëse merren ndaj personave të sëmurë mendorë, të dehurve, të droguarve ose ndaj personave me sëmundje ngjitëse. Në këto raste punonjësi i Policisë e shoqëron personin në mjediset e Policisë, në institucionet shëndetësore, në qendrat e rehabilitimit apo e dorëzon te kujdestari apo personat përgjegjës.

2. Punonjësit e Policisë marrin masat e nevojshme për mbrojtjen:

a) e personit, gjendja e të cilit tregon qartë se nuk mund të kontrollojë veprimet dhe sjelljen e tij dhe për këtë arsye mund t'i shkaktojë dëmtime fizike apo rrezikim të jetës së tij apo të të tjerëve. Zbatimi i masës në mjediset e Policisë vazhdon për aq kohë sa është e nevojshme, por jo më shumë se 10 orë;

b) e të miturit që nuk mbikëqyret më ose është larguar nga prindi apo kujdestari i tij, duke ia rikthyer kujdestarit apo duke e dërguar në qendrat e përkujdesit për të miturit, sipas afatit të përcaktuar në shkronjën "a" të kësaj pike.

3. Për të ushtruar përgjegjësitë e përcaktuara në pikën 1 të këtij neni, punonjësi i Policisë mund të bëjë kontrollin dhe këqyrjen fizike të këtyre personave.

Neni 107

Trajtimi i të shoqëruarve

1. Nëse një person shoqërohet sipas nenit 101 të këtij ligji, atëherë ai duhet të njoftohet menjëherë për arsyet e shoqërimit.

2. Personit të shoqëruar duhet t'i jepet menjëherë mundësia për të njoftuar një të afërm ose një person të cilit ai i beson. Nëse i shoqëruari nuk është në gjendje të ushtrorë të drejtat e tij si më sipër dhe nëse nuk bie ndesh me vullnetin e personit, Policia njofton kryesisht personat e sipërpërmendur. Kur i shoqëruari është i mitur, atëherë në çdo rast njoftohet menjëherë personi përgjegjës për mbikëqyrjen e tij. E njëjta gjë vlen edhe për të rriturit, për të cilët është caktuar një kujdestar.

3. Femrat dhe meshkujt shoqërohen në mjedise të veçuara. Të miturit shoqërohen në mjedise të veçanta nga ato të të rriturve.

Neni 108

Blokimi i sendeve

Sendet bllokohen ose sekuestrohen vetëm në rastet kur lejohet me ligj dhe në përputhje me procedurat përkatëse ligjore.

Me përjashtim të rasteve të parashikuara në ligj, sendet mund të bllokohen vetëm nëse është krejtësisht i pashmangshëm evitimi i kërcënimit të çastit ndaj rendit dhe sigurisë publike. Punonjësi i

Policisë që vepron, harton procesverbalin e caktuar, i cili i jepet poseduesit nëse ai njihet.

Sendet bllokohen vetëm për aq kohë është e nevojshme. Pas kësaj, sendet i kthehen poseduesit nëse është identifikuar ose nëse identifikohet pa vonesë. Nëse brenda 90 ditëve, ose në një hark kohor më të shkurtër, siç mund ta kërkojë natyra e sendit, poseduesi i sendit nuk mund të identifikohet ose nuk kërkon me dëshirën e tij kthimin e sendit, sendi i bllokuar kalon në pronësi të shtetit, në përputhje me legjislacionin në fuqi.

Policia ka përgjegjësinë të kryejë verifikime për identifikimin e pronarit të sendeve të bllokuara.

Neni 109

Kontrolli i personit

1. Punonjësi i Policisë mund të kontrollojë çdo person të arrestuar ose të ndaluar, në përputhje me Kodin e Procedurës Penale dhe me legjislacionin në fuqi:

- a) për të siguruar prova për kryerjen e veprës penale;
- b) për objekte ose sende që mund të rrezikojnë jetën e tij ose të tjerëve.

2. Kontrolli kryhet në tri forma:

kontrolli në publik i rrobave të trupit të një personi, i cili kufizohet në një kontroll sipërfaqësor të veshjeve të jashtme;

kontrolli i imët kryhet në vende të caktuara që nuk shihen nga publiku, ku personi i ndaluar ose i arrestuar nuk shihet nga persona të tjerë dhe përfshin heqjen e më shumë se veshjeve të jashtme;

kontrolli intim, i cili ka të bëjë me këqyrjen fizike të pjesëve të hapura në trupin e personit dhe kryhet nga punonjës të shëndetësisë vetëm në spitale ose në mjedise të tjera shëndetësore.

3. Kontrollat, sipas pikës 2 shkronja “a” të këtij neni kryhen nga punonjës policie të së njëjtës gjini me personin e kontrolluar, kur e lejojnë rrethanat. Për kontrollin e të miturve kërkohet edhe prania e prindit ose e kujdestarit.

4. Punonjësi i Policisë mund të kryejë kontrollin e çdo personi, sipas pikës 2 shkronja “a” të këtij neni, përveç personave, të cilëve ligji u njeh imunitet, kur ka informacione të besueshme se ata kanë sende të rrezikshme për vetë personin apo për personat e tjerë.

5. Kontrolli i imët mund të kryhet vetëm nëse ai vlerësohet i nevojshëm për të hequr sendin e ndaluar dhe punonjësi i Policisë gjykon që personi i arrestuar apo i ndaluar mund ta ketë fshehur atë. Ky kontroll kryhet nga një punonjës policie i së njëjtës gjini me personin e kontrolluar.

6. Kontrolli intim kryhet me vendim të gjykatës. Kontrolli intim ndërmerret si masë e fundit ndaj personit që dyshohet se fsheh prova materiale të veprës penale ose sende që i përkasin veprës penale. Kontrolli intim kryhet vetëm nga një mjek ose infermier i kualifikuar.

7. Rregullat e hollësishme për kryerjen e kontrollit përcaktohen me udhëzim të ministrit.

Neni 110

Kontrolli mjekësor i personit

1. Për të parandaluar kërcënimin për jetën, një personi mund t’i bëhet kontroll mjekësor. Për këtë arsye, marrja e kampioneve të gjakut ose ndërhyrje të tjera në trup nga një mjek, në përputhje me rregullat mjekësore për qëllime ekzaminimi, lejohet pa miratimin e personit, nëse kjo nuk dëmton shëndetin e tij dhe masa vlerësohet e nevojshme nga mjeku.

2. Kontrolli mjekësor i personit bëhet me vendim gjykate, me përjashtim të rasteve të kërcënimit të menjëhershëm, raste në të cilat punonjësi i Policisë e kryen detyrën me nismën e tij. Të dhënat e mbledhura gjatë kontrollit mund të përdoren vetëm për qëllimin e këtij neni, që është parandalimi i rrezikut serioz për shëndetin.

Neni 111

Kontrolli i objekteve

1. Një objekt, me përjashtim të mjediseve të përcaktuara në nenin 112 të këtij ligji, mund të kontrollohet nëse:

a) zotërohet nga një person që është kontrolluar sipas nenit 113 të këtij ligji;

b) faktet bëjnë të dyshohet se brenda objektit ndodhet një person:

i) i cili duhet të arrestohet ose të ndalohe;

ii) i cili është mbajtur në mënyrë të jashtëligjshme;

iii) për të cilin punonjësi i Policisë ka dyshime të bazuara se kontrolli është i nevojshëm për mbrojtjen e jetës nga një rrezik i çastit;

c) faktet bëjnë të dyshohet se aty ndodhet një send tjetër që mund të konfiskohet.

2. Kontrollohet një automjet që ka brenda një person, identiteti i të cilit mund të verifikohet në një pikë kontrolli; kur ekziston një nga kushtet e parashikuara në pikën 1 të këtij neni, kontrolli mund të bëhet edhe ndaj sendeve brenda automjetit.

3. Përdoruesi i objektit ka të drejtë të jetë i pranishëm gjatë kontrollit të tyre. Nëse ai nuk paraqitet, ftohet një përfaqësues apo dëshmitar tjetër. Përdoruesit duhet t'i dorëzohet një kopje e procesverbalit të kontrollit dhe arsyet, nëse kërkohen prej tij.

Neni 112

Ndërhyrja në mjedise

1. Mjedise, në kuptim të këtij ligji, quhen banesa dhe dhomat ngjitur, dhomat e punës, mjediset e veprimtarive profesionale, si dhe çdo pronë tjetër private që lidhet me këto dhoma.

2. Ndërhyrja dhe kontrolli në mjedise mund të bëhen pa lejen e pronarit nëse:

a) është e nevojshme të parandalohet një kërcënim i çastit për jetën dhe shëndetin;

b) një punonjës policie ka dyshime të bazuara të mendojë se një person, i cili plotëson kushtet e nenit 106 të këtij ligji, ndodhet në atë mjedis.

3. Nëse pronari apo personi që zotëron mjedise ose përfaqësuesi i tij nuk janë të pranishëm gjatë ndërhyrjes, sipas pikës 2 të këtij neni, duhen njoftuar menjëherë për arsyen e kontrollit për sa kohë që qëllimi i masës së marrë nuk vihet në rrezik.

4. Në të gjitha rastet e hyrjeve dhe të kontrolleve, sipas këtij neni, punonjësi i Policisë harton një raport, ku përmenden arsyet e hyrjes dhe kryerjes së kontrollit dhe rezultatet e tij. Një kopje e këtij raporti i jepet, sipas kërkesës, personit të interesuar ose personave të autorizuar prej tij.

Neni 113

Kontrolli antiterrorist

1. Punonjësit e Policisë kanë të drejtë të kryejnë me iniciativë kontrolle për parandalimin e akteve terroriste në banesa, ndërtesa, mjedise dhe hapësira publike, për të garantuar sigurinë e personave dhe të rendit kushtetues kombëtar e sigurisë ndërkombëtare. Këtë të drejtë ata e ushtrojnë në rastet e flagrancës, në rast ndjekjeje të personit, si dhe kur ka prova apo informacione të besueshme se është duke u përgatitur një akt terrorist dhe kur nga vonesa e ushtrimit të kontrollit mund të zhduken ose humbasin mjetet ose gjurmët e kryerjes së kriminit. Pas ushtrimit të kontrolleve, punonjësit e policisë janë të detyruar të hartojnë procesverbalin përkatës dhe t'ia dërgojnë atë brenda 48 orëve prokurorit të vendit ku është bërë kontrolli. Një kopje e procesverbalit i lihet pronarit ose poseduesit të objektit apo personit të kontrolluar.

Personat e kontrolluar nga Policia kanë të drejtë që të bëjnë ankim në gjykatën e juridiksionit ku ndodhet organi i Policisë, nëse e konsiderojnë kontrollin e tyre nga Policia si të padrejtë dhe në kundërshtim me ligjin

2. Kontrolli antiterrorist përfshin kontrollin për eksplozivë, kontrollin kimik, biologjik dhe radioaktiv.

Neni 114

Mbledhja e të dhënave

1. Punonjësi i Policisë ka përgjegjësi të mbledhë të dhëna për nevoja të mbrojtjes së rendit e të sigurisë publike dhe/ose për parandalimin dhe zbulimin e krimeve, duke shfrytëzuar çdo burim që mund të japë të dhëna. Për këtë qëllim ai mund të përdorë edhe bashkëpunimin e fshehtë me individë, vëzhgimin e fshehtë të personave dhe mjediseve, si dhe pajisjet gjurmuese të vendndodhjes.

2. Ndalohet marrja e të dhënave për persona vetëm për arsye të tilla si gjinia, etnia, raca, gjuha, feja, bindjet politike, fetare ose filozofike, gjendja ekonomike, arsimore, sociale, prirja seksuale apo përkatësia prindërore.

3. Organet e administratës publike, personat fizikë e juridikë janë të detyruar t'i paraqesin të dhënat identifikuese dhe informacionet e mbledhura në mënyrë të ligjshme, kur u kërkohen nga Policia, përjashtuar të dhënat, shpërndarja e të cilave është e ndaluar me ligj.

4. Rregullat konkrete për përdorimin e burimeve të informacionit, si dhe për marrjen, administrimin, verifikimin dhe vlerësimin e të dhënave që përfitohen prej tyre përcaktohen me udhëzim të ministrit.

Neni 115

Bashkëpunimi i fshehtë me individët

1. Punonjësi i Policisë detyrohet të pranojë dhe të vlerësojë çdo informacion që vjen në mënyrë të fshehtë nga individë dhe që lidhet me mbrojtjen e rendit dhe sigurisë publike dhe/ose parandalimin e veprave penale.

2. Kur një person vendos marrëdhënie të fshehta bashkëpunimi me Policinë për të informuar për çështje që lidhen me mbrojtjen e rendit e të sigurisë publike dhe/ose për parandalimin, zbulimin dhe goditjen e veprave penale, është i detyruar të ruajë sekretin e këtij bashkëpunimi dhe të informacioneve të klasifikuara, derisa të përfundojë detyrimi ligjor për ruajtjen e sekretit.

3. Punonjësit e Policisë kanë detyrimin të ruajnë fshehtësinë e identitetit dhe të rrethanave të tjera për personat që bashkëpunojnë në mënyrë të fshehtë me Policinë, nëpërmjet dhënies së informacioneve për mbrojtjen e rendit e të sigurisë publike ose për parandalimin dhe goditjen e veprave penale.

4. Mënyra e administrimit dhe e ruajtjes së fshehtësisë së deklarimeve ose kallëzimeve bëhet sipas dispozitave përkatëse të legjislacionit procedural penal.

Neni 116

Masa të veçanta

1. Kur në bazë të të dhënave që disponohen dyshohet se një person ka kryer një vepër penale, ose po planifikon apo po organizon që të kryejë një krim dhe kjo veprimtari nuk mund të zbulohet ose të parandalohet në rrugë e mënyra të tjera, punonjësi i Policisë me gradën "Drejtues" ose më lart, sipas juridiksionit lëndor, i bën kërkesë prokurorit për të marrë masat e mëposhtme:

përgjimin e fshehtë të bisedave të një personi në vende publike;

përgjimin e fshehtë të bisedave telefonike ose telekomunikimeve të një personi, në përputhje me legjislacionin përkatës;

përdorimin e pajisjeve teknike për fotografim, regjistrim audio ose video, në përputhje me legjislacionin përkatës.

2. Përdorimi i masave të veçanta, sipas pikës 1 të këtij neni, lejohet për aq kohë sa ekzistojnë arsyet ose rrethanat që kanë bërë të nevojshme përdorimin e tyre dhe zgjat sipas afateve të vendosura në legjislacionin përkatës.

3. Kur referimi i veprës penale, për të cilën janë përdorur masat e veçanta, nuk bëhet brenda gjashtë muajve pas përfundimit të përdorimit të masave të veçanta, të parashikuara në këtë nen, i gjithë informacioni i mbledhur, si rezultat i përdorimit të këtyre masave, asgjësohet.

Neni 117

Veprimtaria informative

1. Veprimtaria informative e Policisë, në kuptim të këtij ligji, vlerësohet procesi i grumbullimit, sistemimit, vlerësimit, analizimit, shpërndarjes dhe përdorimit të informacionit për nevoja të mbrojtjes së rendit e të sigurisë publike ose për nevoja të parandalimit e zbulimit të veprave penale.

2. Veprimtaria informative e Policisë bazohet vetëm në të dhënat e marra në përputhje me ligjet përkatëse dhe me aktet normative të nxjerra në zbatim të tyre.

3. Rregullat konkrete për realizimin e veprimtarisë informative të Policisë prej strukturave përkatëse, si dhe masat për ruajtjen e të dhënave dhe për kontrollin e kësaj veprimtarie informative përcaktohen me udhëzim të ministrit.

KREU III

RASTE DHE FORMA TË PËRDORIMIT TË FORCËS

Neni 118

Përdorimi i forcës

Përdorimi i forcës mbi personat është veprimi i drejtpërdrejtë nëpërmjet forcës fizike, pajisjeve, mjeteve të tjera apo armëve të zjarrit.

Punonjësi i Policisë përdor forcën për të përmbushur një synim të ligjshëm vetëm kur kjo është e nevojshme dhe vetëm nëse të gjitha masat e tjera janë të pasuksesshme apo të pamundura. Punonjësi i Policisë përdor nivelin minimal të forcës së nevojshme, në përputhje me parimin e përpjesëtueshmërisë.

Punonjësi i Policisë përzgjedh nivelin e nevojshëm të forcës ndërmjet mundësive të përshkallëzuara që, ndër të tjera, përfshijnë bindje me fjalë, shtrëngim fizik, mjete goditëse, mjete me lëndë kimike paralizuese, mjete me goditje elektrike, qen policie dhe armë zjarri.

Të dëmtuarit i jepet ndihmë, ku përfshihet edhe ajo mjekësore, pas përdorimit të forcës, në rast se kjo është e nevojshme dhe e mundur.

Punonjësi i Policisë duhet të paralajmërojë se do të përdorë forcën para përdorimit të saj. Ky paralajmërim mund të mos kryhet nëse rrethanat nuk e lejojnë, veçanërisht kur përdorimi i menjëhershëm i forcës është i nevojshëm për të parandaluar një rrezik real dhe të çastit.

Grupe personash duhen paralajmëruar sa më shpejt të jetë e mundur se do të përdoret forcë ose se forma e forcës së përdorur do të ndryshohet, në mënyrë që pjesëmarrësit të lejohen të largohen.

Neni 119

Përdorimi i armëve të zjarrit

Punonjësi i Policisë përdor armët e zjarrit që ka në përdorim në rastet dhe sipas kushteve të përcaktuara në legjislacionin përkatës që rregullon përdorimin e armëve të zjarrit.

Neni 120

Masat e detyrueshme mjekësore

Masat mjekësore të ndërmarra ndaj personave të shoqëruar, si dhe trajtimi i tyre bëhen sipas rregullave dhe kushteve të përcaktuara në aktet përkatëse normative.

Neni 121

Kryerja e operacioneve speciale

1. Për kryerjen e operacioneve të sigurisë së veçantë dhe zgjidhjen e situatave, të cilat nuk

mund të përballohen nga shërbimet e tjera të Policisë, përdoren struktura speciale operacionale rezervë të Drejtorit të Përgjithshëm të Policisë.

2. Përgjegjësitë e këtyre strukturave janë:

- a) çlirimi ose shpëtimi i pengjeve;
- b) kapja e personave të armatosur me rrezikshmëri të lartë dhe transportimi i tyre në mjediset e Policisë;
- c) mbështetja e strukturave, të cilat sigurojnë personalitetet e larta shtetërore, të vendit ose të huaja, në rastet kur ka të dhëna për akte terroriste ndaj tyre;
- ç) rivendosja e rendit dhe e sigurisë publike, kur kjo është e pamundur vetëm me strukturat e tjera policore.

3. Punonjësve të strukturave speciale operacionale u garantohet fshehtësia e identitetit për veprimtarinë operacionale.

4. Mënyra e organizimit dhe e funksionimit të strukturave speciale operacionale, si dhe procedurat, rregullat dhe kriteret e përdorimit të tyre përcaktohen me urdhër të ministrit.

PJESA E PESTË TË NDRYSHME

Neni 122

Policimi në komunitet

1. Çdo drejtor i drejtorive të Policisë në qarqe harton një strategji vjetore të policimit në qark për sigurinë në komunitet, pas këshillimeve me personat e përcaktuar në pikën 2 të këtij neni.

2. Personat e përcaktuar për qëllimet e pikës 1 të këtij neni janë:

- a) prefekti, i cili ushtron funksionet në qarkun që mbikëqyret nga drejtori i Policisë së qarkut;
- b) kryetari i bashkisë dhe drejtues të pushtetit vendor, të cilët ushtrojnë funksionet në Policinë e qarkut që mbikëqyret nga drejtori i Policisë së qarkut;
- c) përfaqësues nga drejtoritë e institucioneve të qarkut;
- ç) përfaqësues nga grupet e interesit.

3. Strategjia vjetore e policimit në qark, e hartuar në përputhje me pikën 1 të këtij neni, duhet:

- a) të identifikojë konfigurimin e veprave penale dhe të shkeljeve të tjera të ligjit, të cilat janë më të përhapura në qarkun përkatës të Policisë;
- b) të propozojë rekomandime për uljen e nivelit të veprave penale dhe të shkeljeve të ligjit në qark dhe të shprehë qartë angazhimin për të bashkëpunuar në mënyrë të vazhdueshme me përfaqësues të komunitetit;
- c) të identifikojë mënyrat si janë trajtuar shqetësimet e ngritura nga përfaqësuesit e komunitetit gjatë 12 muajve të kaluar.

4. Drejtori i drejtorisë së Policisë së qarkut duhet të paraqesë strategjinë vjetore, për të cilën ai është përgjegjës, te Drejtori i Përgjithshëm i Policisë kur paraqet raportin, sipas nenit 30 pika 3 të këtij ligji, si dhe te kryetarët e njësive vendore.

5. Strategjia e Policisë në nivel qarku, së bashku me raportin, sipas nenit 30 pika 3 të këtij ligji, i dorëzohet për miratim Grupit të Politikave në takimin e tij të muajit janar.

Neni 123

Përpunimi i të dhënave personale

1. Mbledhja, ruajtja, përdorimi dhe komunikimi i të dhënave personale për qëllime të Policisë kufizohet vetëm me nevojat operacionale, kur janë të nevojshme për parandalimin e rrezikut real ose parandalimin e një vepre penale. Gjatë përpunimit të të dhënave respektohen parimet dhe rregullat e përcaktuara nga Këshilli i Europës në “Konventën për Mbrojtjen e Individëve për Përpunimin Automatik të të Dhënave Personale” të 28 janarit 1981, ratifikuar me ligjin nr.9288,

datë 7.10.2004 dhe me ligjin nr.8792, datë 10.10.2001 “Për krijimin e Qendrës së Përpunimit të të Dhënave”.

2. Të dhënat mund t’u komunikohen agjencive të huaja policore vetëm mbi bazën e një marrëveshjeje bashkëpunimi, në të cilën struktura e policisë që e kërkon merr përsipër detyrimin se do t’i trajtojë dhe ruajë në përputhje me legjislacionin në fuqi, duke siguruar një shkallë të caktuar të mbrojtjes së të dhënave, të barabartë ose në nivel më të lartë nga ajo që garantohet në ligjet e mësipërme.

Neni 124

Medaljet e nderit dhe certifikatat

1. Ministri jep medalje nderi për punonjës të Policisë, punonjës të shërbimeve mbështetëse dhe punonjës policie të huaj, të atashuar në vendin tonë, kur ata shquhen për merita të veçanta.

2. Drejtori i Përgjithshëm i Policisë dhe zëvendësit e tij japin certifikata lavdërimi për punonjës të Policisë të dalluar në zbatimin e detyrave.

Neni 125

Llojet e medaljeve dhe certifikatave

1. Ministri jep këto medalje: Medalja e Nderit, Medalja për Trimëri dhe Medalja për Shpëtim Jete.

2. Drejtori i Përgjithshëm i Policisë jep këto certifikata lavdërimi: Certifikatë për Shërbime të Dalluara, Certifikata e Karrierës, si dhe Certifikatë për Rezultate në Sigurimin e Rendit Publik.

3. Motivimi, rregullat dhe procedurat për dhënien e medaljeve, forma e tyre dhe shpërblimi financiar përcaktohen me vendim të Këshillit të Ministrave.

4. Llojet e certifikatave të lavdërimit, kriteret dhe procedurat për dhënien e tyre përcaktohen në Rregulloren e Brendshme të Policisë.

PJESA E GJASHTË

DISPOZITA KALIMTARE DHE TË FUNDIT

Neni 126

Kalimi në sistemin e ri të gradave

1. Për kalimin nga sistemi i gradave të dhëna sipas ligjit nr. 8643, datë 20.7.2000 “Për gradat në Policinë e Shtetit”, në sistemin e gradave, sipas këtij ligji, Këshilli i Ministrave nxjerr vendim për përcaktimin e tabelës së funksioneve korresponduese për çdo gradë, si dhe ekuivalentimin e tyre, në bazë të nenit 39 të këtij ligji.

2. Punonjësi i Policisë merr gradën që i korrespondon funksionit që kryen, vetëm nëse ka minimalisht 2/3 e vjetërsisë së shërbimit, llogaritur sipas afateve të përcaktuara në nenin 41pika 4 shkronja “a” të këtij ligji.

a) Punonjësit të Policisë që nuk plotëson vjetërsinë për gradën që i korrespondon funksionit që kryen në çastin e kalimit, i jepet grada më e lartë, për të cilën ai plotëson minimumi 2/3 e vjetërsisë së shërbimit, duke e emëruar në një funksion që i korrespondon gradës që merr.

b) Në vjetërsinë e shërbimit, për efekt të marrjes së gradës në çastin e kalimit, punonjësit të Policisë do t’i llogariten:

i) koha e punës si ushtarak në strukturat e Policisë së Kufirit dhe të Gardës së Republikës, kur ato ishin pjesë e Forcave të Armatosura;

ii) koha e punës me statusin e punonjësit të Gardës së Republikës;

iii) koha e punës si punonjës policie në strukturat e Policisë së Shtetit;

iv) koha e punës në strukturat e Ministrisë së Brendshme ose të Ministrisë së Rendit Publik, si punonjës me status policor;

v) koha e punës në strukturat e administratës publike, me cilësinë e këshilltarit për probleme

të rendit dhe sigurisë publike;

vi) periudha që punonjësi i Policisë ka punuar si ushtarak i shërbimit aktiv të përhershëm, si dhe gjysma e periudhës që punonjësit e administratës shtetërore kanë punuar jashtë strukturave të përcaktuara në nënndarjet “i”, “ii”, “iii”, “iv” dhe “v” të kësaj shkronje;

c) Në rast se punonjësi i Policisë nuk pranon të marrë gradën e dhënë sipas këtij ligji, lirohet nga Policia me gradën që ka mbajtur, sipas ligjit nr.8643, datë 20.7.2000 “Për gradat në Policinë e Shtetit”.

3. Afatet e qëndrimit në gradë, për efekt të konkurrimit për ecje në karrierë të punonjësit të Policisë, pas kalimit në sistemin e gradave, sipas këtij ligji, do të llogariten si më poshtë:

a) nga data e marrjes së gradës, sipas ligjit nr.8643, datë 20.7.2000 “Për gradat në Policinë e Shtetit”, kur grada e marrë nga punonjësi i Policisë në çastin e kalimit dhe ajo paraardhëse është ekuivalente ose më e ulët;

b) nga data e marrjes së gradës në çastin e kalimit, kur punonjësi i Policisë merr gradë më të lartë se ajo ekuivalente, që ka mbajtur sipas ligjit nr.8643, datë 20.7.2000 “Për gradat në Policinë e Shtetit”.

4. Për realizimin e procesit të kalimit në sistemin e gradave, sipas këtij ligji, ngrihen komisione kalimtare, të cilat shqyrtojnë dokumentacionin dhe u propozojnë autoriteteve, që e kanë kompetencë gradimin dhënien e gradave përkatëse punonjësve të Policisë.

5. Përbërja e komisioneve kalimtare, mënyra dhe nivelet e organizimit, të funksionimit, si dhe procedurat që ndjekin këto komisione, përcaktohen me urdhër të ministrit. Këto komisione përfundojnë së funksionuari pas realizimit të procesit të kalimit në këtë sistem gradash.

6. Kalimi në këtë sistem gradash përfundon jo më vonë se gjashtë muaj pas hyrjes në fuqi të vendimit të Këshillit të Ministrave, që do të dalë në zbatim të nenit 39 të këtij ligji.

7. Punonjësi i Policisë ka të drejtë që, brenda 30 ditëve nga marrja dijëni, të ankohet për gradën e marrë tek eprori i autoritetit që i ka dhënë gradën ose drejtpërdrejt në gjykatë.

Neni 127

Trajtimi i personelit

Trajtimi ekonomik e financiar i punonjësve të Policisë në karrierë dhe pas ndërprerjes së saj, deri në miratimin e akteve normative përkatëse, të parashikuara në këtë ligj, bëhet sipas dispozitave të ligjit nr.8553, datë 25.11.1999 “Për Policinë e Shtetit”, të ndryshuar dhe të akteve normative të nxjerra në bazë dhe për zbatim të tij.

Neni 128

Shfuqizimi i akteve

Ligji nr.8553, datë 25.11.1999 “Për Policinë e Shtetit”, i ndryshuar; ligji nr. 8293, datë 26.2.1998 “Për Policinë Kriminale”; ligji nr. 8292, datë 25.2.1998 “Për Forcat Speciale dhe ato të Ndërhyrjes së Shpejtë”, i ndryshuar; ligji nr. 7498, datë 5.7.1991 “Për ruajtjen e rendit e të qetësisë”, i ndryshuar; ligji nr. 8643, datë 20.7.2000 “Për gradat në Policinë e Shtetit”, si dhe akte të tjera normative në fuqi, që rregullojnë veprimtarinë e Policisë, por që bien ndesh me këtë ligj, shfuqizohen.

Neni 129

Miratimi i akteve normative

Ngarkohet Këshilli i Ministrave dhe ministri të nxjerrin aktet normative në zbatim të këtij ligji brenda një viti nga hyrja në fuqi e tij.

Neni 130

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.5359, datë 19.6.2007 të Presidentit të Republikës së Shqipërisë, Alfred Moisiu

LIGJ
Nr.9750, datë 4.6.2007

PËR DISA SHTESA NË LIGJIN NR.9072, DATË 22.5.2003
“PËR SEKTORIN E ENERGJISË ELEKTRIKE”, TË NDRYSHUAR

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Në ligjin nr.9072, datë 22.5.2003 “Për sektorin e energjisë elektrike”, të ndryshuar, bëhen këto shtesa:

Neni 1

Në nenin 46 shkronja “c”, në fund të fjalisë shtohen fjalët “dhe vendos masat administrative për mospërbushjen e tyre, sipas nenit 46/1”.

Neni 2

Pas nenit 46 shtohet neni 46/1 me këtë përmbajtje:

“Neni 46/1

1. Lidhja elektrike pa kontratë, lidhja elektrike para aparatit matës dhe cenimi i vulave ose dëmtimi i sistemit matës të energjisë elektrike nga përdoruesit familjarë, kur këto shkelje nuk përbëjnë vepër penale, dënohen me gjobë si më poshtë:

- a) për lidhje abuzive para sistemit matës, nga 1 000 deri në 5 000 lekë;
- b) për cenim të sistemit matës dhe të vulave të tij, nga 1 000 deri në 10 000 lekë;
- c) për lidhje në rrjetin elektrik pa kontratë, nga 5 000 deri në 20 000 lekë.

Në çdo rast, krahas gjobës, ka edhe detyrimin e shlyerjes së dëmit shkaktuar entit shpërndarës përkatës.

2. Kur shkeljet e përcaktuara në pikën 1 të këtij neni bëhen nga përdoruesit jofamiljarë, dënohen me gjobë si më poshtë:

- a) për lidhje abuzive para sistemit matës, nga 10 000 deri në 100 000 lekë;
- b) për cenim të sistemit matës dhe të vulave të tij, nga 10 000 deri në 300 000 lekë;
- c) për lidhje në rrjetin elektrik pa kontratë, nga 100 000 deri në 500 000 lekë;
- ç) për shtesë fuqie të instaluar mbi atë të deklaruar në kontratë, nga 5 000 deri në 50 000 lekë.

Në çdo rast, krahas gjobës, ka edhe detyrimin e shlyerjes së dëmit shkaktuar entit shpërndarës përkatës.

3. Për përcaktimin e saktë të vlerës së gjobës dhe të dëmit të shkaktuar entit shpërndarës përkatës, sipas llojit të shkeljes, madhësisë së fuqisë së instaluar në objekt dhe kohës së vërtetuar me

shkelje, zbatohet tabela e penaliteteve dhe e dëmeve, miratuar nga Enti Rregullator i Sektorit të Energjisë Elektrike.

4. Gjobat vendosen dhe vilen nga inspektorët e strukturës përgjegjëse për kontrollin e energjisë elektrike në KESH sha. Pagesa e gjobës bëhet brenda 10 ditëve nga data e vendosjes së saj.

5. Gjoba përbën titull ekzekutiv dhe ekzekutohet nga zyra e përmbartimit.

6. Kundër vendimit të dënimit me gjobë bëhet ankim me shkrim, brenda 10 ditëve nga data e njoftimit të tij, tek titullari i strukturës përgjegjëse për kontrollin e energjisë elektrike, i cili duhet të shprehet me shkrim brenda 30 ditëve.

7. Me shpalljen e vendimit të mospranimin të ankimit bëhet menjëherë ndërprerja e furnizimit me energji elektrike. Subjekteve, që nuk kanë bërë ankim me shkrim, u bëhet ndërprerja e energjisë elektrike.

8. Kundër vendimit të titullarit të strukturës përgjegjëse për kontrollin e energjisë elektrike mund të bëhet ankim në gjykatë brenda 10 ditëve nga shpallja.”.

Neni 3

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.5355, datë 14.6.2007 të Presidentit të Republikës së Shqipërisë, Alfred Moisiu

Abonimet vjetore mund të bëhen pranë Postës Shqiptare ose pranë Qendrës së Publikimeve Zyrtare, në adresën: Bulevardi “Zhan d'Ark”, prapa ish-ekspozitës "Shqipëria Sot", nr.tel: 04 267 468
Çmimi i abonimit për Fletoret Zyrtare 2007 është 16 000 lekë.

BOTIMET E QENDRËS SË PUBLIKIMEVE ZYRTARE

1. KUSHTETUTA E SHQIPËRISË
2. KODET E LEGJISLACIONIT SHQIPTAR
3. REGJISTRAT E NOTERISË
4. PËRMBLEDHJE LEGJISLACIONI:
 1. PËR PROKURIMIN PUBLIK (2006)..... 1500
 2. PËR NËPUNËSIN CIVIL (2005) 600
 3. PËR SISTEMIN E DREJTËSISË (Vëllimi i I-rë dhe vëllimi i II-të-2006)..... 1300
 4. PËRMBLEDHJE LEGJISLACIONI NË FUSHËN E ARSIMIT..... 500

Botime të reja

- 1 TREGUESI KRONOLOGJIK I LEGJISLACIONIT-2004 (Vëllimi I)..... 1000
- 2 TREGUESI KRONOLOGJIK I LEGJISLACIONIT-2006 (Vëllimi II)..... 500
- 3 TREGUESI TEMATIK I LEGJISLACIONIT-2004 (Vëllimi I)..... 1000
- 4 TREGUESI TEMATIK I LEGJISLACIONIT-2006 (Vëllimi II)..... 500
- 5 PËRMBLEDHJE MARRËVESHJESH NDËRKOMBËTARE NË FUSHËN E DREJTËSISË..... 1000
- 6 PËRMBLEDHJE LEGJISLACIONI PËR PUSHTETIN VENDOR..... 800
- 7 PËRMBLEDHJE LEGJISLACIONI PËR NDËRTIMET..... 500
- 8 PËRMBLEDHJE VENDIMESH UNIFIKUESE TË GJYKATËS SË LARTË (2000-2006)..... 1000
- 9 PËRMBLEDHJE LEGJISLACIONI PËR SHOQËRITË TREGTARE..... 500

Hyri në shtyp më 19.6.2007
Doli nga shtypi më 19.6.2007

Tirazhi: 3500 copë

Formati: 61x86/8

Shtypshkronja “Grafon”
Tiranë, 2007

Çmimi 56 lekë